



勉菴集  
十九

共二十三

~16  
2374  
19



和  
號 2874  
卷 23-19

勉菴先生文集卷之三十七目錄  
行狀



敦寧府都正崔公事狀

吏曹正郎黃公行狀

成均進士金公行狀

蘭谷尹公行狀

農窩朴公行狀

山南金公行狀

農窩祭公行狀

慶源府使 贈兵曹叅判柳公事狀

兵曹叅判沙厓閣公行狀  
咬菜窩閣公行狀  
節度使許公行狀  
雲溪先生黃公行狀  
贈成均館祭酒履齋李公行狀

勉菴先生文集卷之三十七目錄

勉菴先生文集卷之三十七

行狀

敦寧府都正崔公事狀

公諱鎮夏字君舉號松巖系出慶州麗朝有諱先位  
諱宗浦諱逸俱官三重大臣僉議政丞入 本朝有  
諱亨漢號永思亭官掌令當燕山斬伐之際以極諫  
被禍後配食鄉祠於公為十世祖九世祖諱彥濬進  
士與二弟俱入館薦八世祖諱松年官縣監 中宗  
己卯以上舍生疏救靜菴趙先生蓋永思亭至縣監  
公俱以守正不阿為時類齟齬未展其用考諱濬號



月菴捐介絕俗克紹家聲妣光山金氏市西諱璇六  
世孫金夫人將娠夢白龍以 英宗乙卯九月日生  
公于光州西水春里第自幼莊默若成人稍長自知  
讀書不煩提飭月菴公嘗歎曰吾有子矣十七丁外  
憂哀毀感人殯歛墓祭曲盡情文鄰稱以知禮制  
除將聘於其行著麻鞋挾冊讀書人或譏笑而若未  
之聞唯反躬務實討論講磨是急焉餘力業功令鄉  
解國試多高占由是聲聞蔚然當世名卿多器重之  
遂以甲午登科隸屬槐院庚子由尚衣院主簿遷  
溫陵令壬寅除兵曹正郎尋兼春秋館記注官時匪

人秉銓長嘗因朝士與公相善者致慇懃意公正容  
徐言曰注擬公也何因私謁君欲以是悅我更勿過  
從一座皆慙然失色遞拜典牲署主簿未幾還拜兵  
郎丁未遭母夫人憂衰年執禮益勤服告書壁以示  
更無進取意伯氏竹巖公深以祿仕之意再三勸起  
公遂黽勉就道曰身既委質焉敢孤負一體三事並  
行不悖則知我罪我其惟天乎癸卯特拜司憲府持  
平每引對多敷奏 上亟稱許連蒙內藏書籍及錦  
囊之 賜人皆榮之甲寅又拜持平以疾辭附陳時  
瘼乙卯特陞一資為敦寧府都正兼曹司衛將而公

年已周甲矣先是公移寓靈巖郡江亭里適輔有年  
至是遂還尋初服蔬糲不繼而處之泊如惟以書籍  
自娛不知老之將至堂前有古松盤據蒼翠可愛意  
到則葛巾藜杖盤桓其下悠然自得視不義富貴殆  
同浮雲而世或莫之知也辛酉十月日以天年終於  
寢享年六十七遠近士友咸以位不稱德惜之公器  
宇弘毅性度典雅以四勿九容爲檢身之柯則每日  
晨起誦庸學序及出師表古今名臣奏疏已冠帶進  
大夫人所問寢視食極其怡愉朔望詣親墓焚香省  
拜在京邸遇先世忌日必整巾服跪坐達曙值迅雷

急雨雖夜必起待止而寢平居儼然若不可犯而至  
其待人接物雍容寬平不見畦畛平生足迹不及當  
路入或以時尚勉之則輒曰名利場事小身心上事  
大若不恤其身而妄營營於一資半級是得小而失  
大也何必乃爾值鄉辭或言君與掌試有契蓋爲子  
孫計公喟然曰吾於科宦曾不由邪徑今反以己之  
所不爲施於後生耶又以三物八刑爲導俗之急務  
每月坐間左考課勸懲由是鄉風丕變過誤者必曰  
恐崔某知之疑難者必曰於崔某質之嗚呼此公平  
生天略也由是觀之則其居家而敦孝友恭儉之德

立朝而無枉已循人之私者槩可想像而豈忘靡喪  
恥背君遺親切切於形氣利害上人所可奉其脚板  
也哉翌年壬戌葬于郡北牙山面白也里負庚之原  
配天安全氏爾璫女工曹判書思敏十三世孫婦德  
克備事君子以禮教子弟以義方後公十一年卒祔  
于公墓下二男德瀚德洙俱有文行公歿後七十六  
年丙子嗣孫景烈以公三從孫模淳所撰行錄一度  
訪余海上請為紀實之狀余方抵冒邦憲求死不暇  
何敢尚論古今以重訾謗而顧其為先遠來之意有  
不可終孤謹叙次如右

吏曹正郎黃公行狀

公諱起漢後改基源字應肇號竹林其先長水人國  
初領議政謚翼成公諱喜佐我 世宗大王致太平  
至今婦孺皆誦之公其後也自是簪組蟬赫世不絕  
書高祖諱宇中祖諱象坤皆隱德不仕考諱有鎮推  
公侍從 恩授僉知中樞府事世居長興今為綾州  
蓮花洞人妣淑夫人晉州姜氏士人諱以興女公以  
繼祖丁丑生生二十三年丙中 憲宗己亥庭試歷  
仕四十一年而以今 上己卯卒於開城府任所壽  
六十三引而歸葬于寶城郡道村面龍虎洞坐艮之

原內而權知承文院副正字 孝陵別檢成均館典籍 肇慶廟令司憲府監察持正禮曹佐郎文臣宣傳官司諫院正言吏曹正郎外之慈仁縣監黃山道察訪開城經歷是其履歷也公自幼志氣不羣嘗就學里塾同儕欲攘隣鷄公不可乃牽其家犢而令齋奴屠之以供一飽又有書丹不具至廢業者則遂斥賣數畝田換多少經史與之共及其登第謂少年高科一不幸公私暇餘不輟誦讀事親至孝大夫人嘗病絕而不甦者幾半日血指進之得以回蘇居官盡職不以外人是非爲展縮在 孝陵見園池廢塞到

直初即疏浚以新之 肇慶見本廟及 慶基殿儀物破敗不堪用遞去後數十年疏請修葺而不報丙寅江都之役帥臣棄城走中外洵洵朝士之有官職者亦多雉鳥散公時以軍卿留旅邸或謂時象如此盍去諸公曰散班之一命以上尚有奔問之義况曾經侍從處在輦轂值此 聖上宵旰之日而欲脫身自私耶處之泰然不以為意時論多之前後莅郡俱以廉明著績賦歸時行李常蕭然無一物人有勸以子孫計則曰清白二字是我家青氈曷容變改其篤於君親重義輕財有如此者性又寬簡在公在家未

嘗疾言遽色俗尚侈靡一冠履之美惡而榮辱隨至  
公守古制衣大布不以時勢易其操大院君謂今之  
不著綿襪者惟見黃某一人此雖小事可見公制行  
之一端也公歿後九年嗣子藉以鄉中處士鄭義林  
狀來曰願加刪潤而尾以公名則甚大惠也余辭非  
其人而不獲因竊惟念曾於公雖無傾蓋義切同朝  
亦嘗於公私座席一再見其動止端重語言悃悃目  
屬而識之者赫赫如昨日事且况處士之狀一皆考  
實而非誣則當此洋瀾滔天民彞墮地之日雖寸長  
片善而屬道理邊物事固當俱收並錄以資後人見

聞在所不巳况公之事行卓然如許而可任其泯沒  
也耶因序次如右

成均進士金公行狀

公諱慶奎字德興姓金氏愚拙其自號也籍慶州系  
出新羅敬順王歷高麗至本朝簪纓蟬赫世不絕  
書貞肅公諱仁鏡號明菴文章事功著在史乘四傳  
至諱冲漢官禮儀判書號樹隱與鄭圃隱李牧隱諸  
賢倡明道學有功斯文麗社屋以願從伯夷採薇西  
山之句太祖降謫南原世稱六隱之一南原松京並  
有院祠以享之於公為十五代祖中徙光州今為興



德縣人高祖諱就善曾祖諱澳號養性齋嘗從遊于陶菴李文正文正公文正亟稱其造詣之精深祖諱翼柱號遜齋考諱魯錫號樹翁俱以文學行誼聞於中外妣平山申氏諱鑽之女嘗夢遜齋公賜徑寸寶珠光彩滿室者一顆有娠而以純祖七年丁卯十二月一日戊辰舉公公稟賦秀異自襁褓時疾痛外晝夜不聞啼聲人咸異之才學語便請讀書五歲授千字文至日月盈昃問日月則固然日亦有盈昃時節乎樹翁公大驚曰汝能知此乎日或有蝕而復圓則亦可云爾既齒讀通鑑至蕭何治未央宮曰非壯麗無

以重威問曰帝堯三等土階茅茨不剪而天下治蕭何贊相云而今何壯麗宮室以啓時君之後靡乎樹翁公大喜曰汝何知蕭何之深意乎高帝山東人見秦宮室燒殘必思東歸故故壯麗宮闕俾定都關中之策然不欲令高帝窺其秘意故辭以塞責耳八歲賦初月有天公秉大燭萬古闢長夜學業將進象唯者未圓時之句座客呀然曰此兒非只文章將為鳴世大儒蓋其看書作文意象超越已具老成體段稍長出入經史泛覽百家戰藝庠塾名句傑作奎人耳目雖老師宿儒咸讓與一頭無敢先焉猶自以為不

足仰思俯讀晝夜攻苦以俛焉孳孳斃而後已爲準  
的至於親迎之夕不輟誦念如在家時同儕或從傍  
譏笑公曰大禹聖人乃惜寸陰况余駑質安敢自逸  
乎十六歲丁內憂哀毀盡情禮事繼妣洪夫人一如  
所生而無間丙申樹翁公病卒京邸公戴星奔馳備  
經險阻哀慕哭擗幾於傷生返觀卒襄萬無一幸而  
自引至窆能以筋力動合禮制以 哲宗乙卯中司  
馬試謂太學首善之地議論之所自出時或往來居  
留逮至今 上丙寅洋賊陷江華都城戒嚴同舍生  
並失魄固措公倡言曰吾輩當此大變宜周旋始終

於夫子之廟庭不宜先事慮患而為趨避也衆議乃  
定戊辰有國內書院盡行毀罷之命玉川竹樹考巖  
以三先生畢命之地而並入焉公慨然不自勝將以  
道會治䟽道臣發其事竟以通首三木囊頭數月滯  
獄備經拷訊人皆危之而少無沮色癸酉益鉉安論  
時政犯觸忌諱時太學多士承望當路風旨論議崢  
嶸甚至捲堂公又再三爭不得遂削名以退翌年甲  
戌䟽請 皇廟復享事得以竣因以丙子十月十六日  
感疾卒于寢享年七十遠近士友咸誄挽以哭之卿  
宰諸公之素相善厚者亦咨嗟太息曰賢人逝矣以

其年十月十七日墓于桂洞丑坐之原公自幼少時  
已於科舉外有用心處及自永感以後斷置世事日  
以近思錄性理大全論語等書研精覃思不得不措  
其自為而為人者一以反躬務實母自欺謹其獨為  
究竟法是致積中發外望實愈隆邑薦道刻後先炳  
赫至擬寢即之望而未霑一命者抑有數存焉顧於  
公又何加損抑有一說國家之建學設官培養多士  
政使其講服先聖先師之道無事則篤信力學積累  
充養以為之本有事則激揚清濁守死善道使夫三  
綱五常天經民彝賴不墜地而斯文之興廢世道之

污隆係焉其責任之重焉如何而習尚日下諛滯塞  
路士不聞大道之要則冠章甫衣縫掖而以夫子之  
道及害夫子者滔滔也于斯時也公以豪傑穎銳之  
姿兼諱明體認之功能陰陽淑慝之別辨之嚴守之  
固不計倚人是非自巳利害砥柱頽流蔚然為士林  
領袖而不負我 列聖朝禮義之教者豈一時偶然  
而致哉目見時事板蕩而大義將晦則其憂深慮遠  
挺身立脚期欲扶持萬一於危迫之際致有多少顛  
沛而無悔者非見理精深而存心不苟不能也嗚呼  
今日何處得來夫人寧越辛氏諱起兌女婦德克備

配君子無違禮先公九年卒塋在別塋生四男二女  
男長鍾黃次鍾夾鍾林鍾應二女並早卒鍾黃男若  
雨幼女李鑽炯鍾夾男龍雨天雨瑞雨晉雨女柳成  
煥鍾林男泰雨女朴鎮休鍾應男昌雨鍾黃甫固窮  
勤學克紹先業乃以志行之述屬在不佞竊惟謏陋  
見聞又疎文字再三辭不得顧其原狀詳悉該貫細  
大俱舉設有所云有同疊床謹撮其梗槩叙次如右

蘭谷尹公行狀

公諱榮鎮字士彥尹氏坡平大姓以高麗太師諱莘  
達為上祖五世文肅公諱瓘官門下侍中有開邊功

民至今賴之歷麗洎本朝簪組蟬赫至同知中樞  
府事諱確始居湖南之南平縣孫歸臥亭諱廷勳曾  
孫藍川子諱儉壬丙之役起義旅並蒙贈典又三  
傳諱珏搬移綾陽南一坊手植七松因榜其亭而子  
孫居焉在公為五世以上高祖諱東顯贈司僕正  
曾祖諱仁守號松梧堂贈承旨祖諱範殷考諱萬  
衡以行義著稱鄉里妣豐山洪氏永樸女以仁陵  
丙子七月八日生公自幼聰穎過人四五歲受十字  
文十九史略雖遊戲中待讀數畢始掩卷未成童能  
通孝經四子及百家語考心菴公亟稱以吾家千里

駒事父母至孝及其喪也哀毀踰禮廬墓盡制朔望  
省掃不以祁寒暑雨或廢鄰里多感動不敢有不義  
事今 上丙寅洋賊陷江都中外騷發又以移孝之  
忠謀同志若干人將約日舉義聞寇退而止乃結小  
廬於九峰山下扁以蘭谷左右圖書物我兩忘不知  
老之將至於是士林推轂太守虛座校宮之役賓興  
之禮皆訪問條例風韻所及咸稱以一鄉善士十室  
忠信而無間然平居恒以文行謹勤訓子弟見人有  
善若已有之如其不善必以道理反復曉告期於改  
革而後已年六十一而卒於丙子十二月二十六日

臨革無怛化意取水洗手足整冠衣就枕怡然而逝  
塋于墨谷佳芝洞負壬之原夫人安東權氏考成祿  
陽村近後貞淑柔嘉克配其德育三男三女男滋煥  
滋鉉滋益女適梁致模文奎煥閔鳳鏞其為柳某妻  
者側室出也長房男相祿次房婿李秉珉奇東洲季  
房有三男幼公歿十六年仲子滋鉉甫以公遺事來  
曰吾先子沒世林樊雖不槩見顧茲一二行治願得  
公一言以圖不朽夫闡先人之常情然與其浮而不  
實寧謹而可信今觀滋鉉之錄蓋嘗講不明不仁之  
戒者也遂彙括叙次以備立言者攷信

農窩朴公行狀

公姓朴諱鼎鉉字弼瑞系出順天國初右議政靖厚  
公可興之後也曾祖重元祖達鎮號柏堂有行誼考  
聖洛妣青松沈氏公以純祖辛巳生于光州里第  
稟質秀異不煩教導已自屹然及就外傳文藝夙就  
日誦數百言事親怡愉洞屬溫清滌滌常若不能盡  
心三年侍疾除謁醫問藥暫不離側居喪盡禮制臨  
祭思其所嗜雖屬難求不憚遠近寒暑必得而後安  
治產以葛單幽風為節度性輕財敦親收族賙窮恤  
匱凡義所當為處並實心施與無絲毫吝滯值歲大

無隣里道路不能食者咸匍匐填滿公洞開中門饘  
粥酬接自冬至春如一日賴以全活者殆百餘人又  
有一過女解媿諾側幾殊輒引置門外軫念飢凍獲  
完乃已其至誠惻怛由內達外自近及遠無一毫勉  
強者有如此嘗謂農雖小人之事民以食為天今工  
工商商得志橫行於天下風移俗易而民天窮矣宗  
族鄉鄰之間講務本抑末之義不至胥溺可也乃偏  
其燕居室曰農窩以示明農食力之寶竒蘆沙金重  
菴諸贖皆作記以美之有子海量教養甚勤絕不以  
家人生業累其心而妨其工居有食出有衣行遠有

資糧使親師就友攻學績文而有聲士林者蓋其精力所到也年六十五而以今上乙酉十月六日卒于寢遠近上下咸曰善人亡矣嗚呼人性本善無古今之殊而但氣質拘於前物欲蔽於後遂失其本然者多矣惟公以淵源世家能自樹立平生行治不外乎孝友睦婣忠信勤儉而得全其天賦之性子夏氏所謂雖曰未學吾必謂之學矣者非公而誰也至若仁民愛物拯濟許多人命於溝壑之日則又今世之所絕無也彼見利忘義為富不仁沒身不之悟者果皆何如人哉余以寡陋見知公父子間頃於嶺海之

行一再拜公於河南歷路見其容貌古服氣像甚偉雌黃不設於口喜愠不形於色溫和樂易藹然有薰人之德不問知為君子人也至今追惟赫赫如昨日而幽明相阻遽已為數十年光陰嗣孫源東妙年克家謂其為先人之執契而託以知己者莫余若也要撰述梗槩以告來後余搦筆投涕竊不勝俯仰之感也遂書其平日見聞如右後之人庶有以攷焉

### 山南金公行狀

山南金公仁基字泰亨籍慶州以高麗禮儀判書冲漢為上祖直提學綽為入我朝顯祖通德郎尚五

贈掌樂院正運龍

贈戶曹參議希謹

贈戶曹參

判之煜是祖禰以上四世妣豐山洪氏夢北斗八懷  
而生公因小字曰夢斗自幼骨相頗偉聰穎出等夷  
讀書自五經四子百家羣書率皆涉獵貫通下至錢  
穀甲兵衆所不屑者亦洞究源委不得放過曰宇宙  
間事皆男兒分內安知他日不為吾輩責乎其天賦  
絕倫自任不輕如此事親極愛敬疾病焉露禱膏糞  
居喪也執禮不懈親沒以後即杜門廢舉抱拙自靖  
而及夫丙寅洋擾中外戎嚴凜凜若禍迫朝暮則能  
慷慨奮義計以為汛掃廓清而保活民國者雖其事

之未就而可使肉食輩愧死不暇其忠孝之根於性  
而著于外又如此教子弟每以為已務實反經息邪  
講尊攘之義嚴人獸之別而不墜先王成法聖賢謨  
訓為日用茶飯嘗過嶠南登蠹石之樓吊戟亾壯士  
嗚嗚有千載不平之意至其高尚志事不從詭隨則  
雖以直指按廉之貴且尊尚亦願見而不得是又所  
存所養自有定力而非襲取於朝夕也蓋使東韓一  
隅於中於外盡得如公輩人使居官任職無事而謹  
難進易退之節有事而敦親上死長之義則彼天外  
異類何能聘怪於白日之下而汨陳我數千年衣裳



文物也耶嗚呼唏矣公生以 仁陵丁卯卒於今  
上丁丑壽七十一葬于綾州丹陽面甕店後壬坐原  
夫人咸平李氏儒誠女貞淑謹密事君子無違禮公  
之孫奎源收拾遺事千里躡跣見屬以刑潤之役則  
不佞於公雖無傾蓋之舊而課忠責孝彞情野同因  
撮其大旨寧略無煩規原狀殆減三之一焉非曰文  
也要以塞孝子慈孫闡先之誠云爾

農窩梁公行狀

梁公諱愔字曰彥貫濟州芝軒翁相麟第二胤也  
其生以 仁陵乙酉正月五日卒於 當寧壬辰六

月五日公生稟秀異自幼時應對周旋便若老成讀  
書寫文字識趣日進才省事乃廢卷太息曰父母耕  
織不遑自給身為人子忍恣然袖手乎以一人之身  
分作兩人之役如董召南可也乃朝出耕山樵水漁  
以充甘旨夜歸讀古人書以長識見及家力稍紓木  
食有賴則又不屑屑曰財不必多苟免飢寒足矣自  
事親奉祭以至持心守身處物應事皆動有成法一  
出悃悃與其兄友愛尤篤問訊暄涼軫念飢飽衣食  
常用之外歲報浪費數百金二十年如一日而無難  
邑每春秋窮節村父老不能炊者賙給有差視諸姪

如已子婚嫁所需上學應舉之費少無差殊至隣里  
族戚待之皆有恩義晚居黃鶴山下青龍洞有園林  
泉石之勝乃俯仰其間不干外事自號農窩蓋亦以  
老農自居與世相忘之意也墓綾州虎巖面牛峙後  
麓卯原配光山李氏龍河女婦德克備先公六年卒  
墓合祔梁君順集公之慈明也千里曳衰涕泣而言  
曰在海生有知家大人縱令遊學里中既稍稍識字  
則又詔之曰能紹先人之業者汝也吾雖無以遺汝  
終不以家人產業累汝以分其力也是以在海居有  
食出有衣行遠有資至南遊懷川北至白雲以及于

丈人者皆大人賜也顧不肖愚陋不能立揚以致顯  
榮又並與其可傳志事而任其泯然無著則不明不  
仁獲戾神明甚大懼也余欽在對曰曩固知順集之  
賢今而後又以知順集之所以賢有自也謹就其原  
狀略加櫟括叙次如右

慶源府使 贈兵曹參判柳公事狀

壬溪柳公諱擎天字重汝我 昭敬大王二十五年  
壬辰漆齒匪茹 大駕西狩中外板蕩大臣金貴榮  
同樞黃廷彧等奉臨海順和兩王子入會寧府倭酋  
清正且躡其後踰摩天嶺嶺北列邑望風瓦解土民

鞠景仁等又為其前導執兩王子及諸守宰囚之別館各鎮將吏并聲和應無肯以向前討賊為已任者前北評事鄭公文孚以文武全材受命視事猝當搶攘未知所出方召募倚近壯勇忠義之士會府中計事公時以高嶺僉使率兵來會倡言衆中曰賊衆雖多禍亂者不過數人請率褊裨手執一劍乘其未備擊斬渠魁則餘黨不足慮也鄭公從其言即與府人申世俊等合力討斬景仁等十三人徇于諸鎮於是衆推鄭公為義兵大將威聲大振首建會寧之捷實計自公出也事聞移拜慶源府使兼右衛將同北虞

侯韓仁濟等守遼河與賊遇於石嶺公整勅部伍左右奮擊自長坪臨滇以至長德山雙介浦之賊並就討平又與清正遇於白塔三戰三勝使幽岐故疆免為左社亦公始終左右之力也惜乎以若殊功大業宜即有格外褒典而為當時忌公者所沮泯沒六十六餘年始因陽坡鄭相公送奏贈騎省戴卿因又配食於關北彰烈祠戰功首末備載國朝寶鑑北關誌及崔崑崙所撰吉州勝戰碑文斑斑可考而鏡城姜姓人家又有雙浦破倭圖列書舉義諸公三十一人而公居第七則公私文獻又不啻章章豈容一時一

人所可任私推移也耶公文化大姓以高麗大丞諱  
車達為鼻祖七代祖諱思恭 世子翊衛司洗馬高  
祖諱敬仁文科博士曾祖諱菱進士祖諱自慎以學  
行薦官至弼善考諱熙良官訓鍊主簿其生以 明  
宗癸丑卒於 宣祖甲午享年四十二葬于富平崇  
岳里枕子之原配水原白氏正義弘女子忠進訓鍊  
主簿噫忠義之性出於人心之秉彛策名委質以爭  
君人者宜其講之熟矣而竊觀壬辰之役能以下邑  
偏師捨命討賊贊襄中興若柳公者有幾人哉是非  
義理之分取舍之極洞然胸中不為利害禍福所搖

奪而能然乎若公可謂得其本心而無愧為人臣之  
義矣蓋鉉聞見孤寡尚論前古慚非其人而聞風好  
德彛性疇同遂就其傳來文獻略加刪潤以屬其後  
孫元烈甫

兵曹叅判沙陞閔公行狀

公諱胄顯字穉教沙陞其號也系出驪興閔氏之先  
顯自麗朝平章事文景公諱令謨兵部尚書諱湜都  
僉議政丞文仁公號默軒諱漬三世名德著在史傳  
入我 朝執義諱懷參號義菴六臣禱作以 定順  
王后宋氏內兄弟謫守大靜縣暨還不就洛中舊第

因卜等于綾州之月谷 成廟朝屢徵不起在公爲  
十一世五世諱彭齡丙子舉義卒 贈教官曾祖諱  
濟益 贈司僕寺正祖諱相東 贈左承旨考諱百  
巖 贈戶曹叅判俱有行義三世追爵以公貴也妣  
贈貞夫人蔚山金氏河西先生後邦燁女以 崇禎  
四戊辰四月十二日戊寅舉公于同福里第寔我  
純祖大王卽位之八年也公天稟秀異自幼凝重不  
喜走美上學受史畧至書契以前年代國都不可攷  
而遽問曰年代旣不可攷則何以知天皇地皇之一  
萬八千歲人皇之四萬五千六百年之事乎然判公

大奇之旣長治功令禁同輩皆歛衽推先以 哲宗  
辛亥擢庭試文科由承文院副正字歷 肇慶廟別  
檢成均館典籍司諫院正言獻納司諫司憲府掌令  
執義文臣兼宣傳官壬戌南土有民警 上命設釐  
整廳親策發問以三政利病公奏對言董仲舒有言  
曰爲政而不行甚者必更化之乃可理也程夫子云  
大變則大益小變則小益政今日之謂也左右掣礙  
做說矛盾誠如 聖教而與其立視其弊束手無策  
孰如且加更張以觀其效乎然則田賦之矯弊一言  
蔽之曰改量而已矣天生一世人足了一世事則不

患其無人矣天之生財元有此數節於彼而用於此則不患其無財矣改量而未善其弊固不少而猶愈於不改之爲無窮之弊也若夫軍籍之矯弊我國五衛廢而根本未固三營始而國用漸縮說者或言更復之爲宜而今難遽議矣自數年來爲戶布之法使班戶均當此固出於不得已之政而殊不知上下之無分紀綱之解弛甚可寒心也臣竊念仍舊周番也則名分紊矣更爲歲抄也則擾民甚矣不如且就小民中使自爲周番以爲正名分息騷擾之地庶可爲便民之方矣至若還穀初非先王之經法乃是後世

之修潤作法在良猶恐其弊况還之爲法始已不善宜其末弊之無窮也夫食者人之命也食之所在莫不朶頤焉朶指焉歛之於此置之於彼而使人者守是教人以偷也輸來運去使其民不得休息孰若物各付物使其民各自樽節乎古人所謂國雖小儲民可藏富者是之謂矣况出納之際耗損太多者乎今若遵 祖宗朝舊典復置常平倉於京外而參互隋氏義倉朱子社倉高麗常平倉之法而潤色之則庶可爲便民之方矣對上不報今 上甲子奔哭 哲宗大喪除奉常寺正遞拜執義遂陳疏辭尾附勉聖

學正邦禮二事其略曰環東瀛數千里生民之苦樂  
自祖宗五百年社稷之安危惟係於殿下之一  
身其所以主宰乎一身管攝乎萬化亦惟殿下之  
一心耳曾傳言齊治平而先言誠正漢儒言朝廷萬  
民而先言正心心者出治之本也治心之要咸備於  
小大之學而小學為基本惟我殿下冲年嗣服方  
講是書端本之在是矣作聖之以此矣國之大事在  
於祀典孔子曰明乎禘嘗之義治國其如視諸掌乎  
程子曰冬至祭始祖此厥初生民之祖也冬至一陽  
之始故象其類而祭之此莫非先王報本追遠之意

後賢因情起義之事也粵在我英廟辛卯命建  
肇慶廟於全州府祀始祖司空公其禮也倣乎三國  
始祖之廟參以國朝各陵之享祭以春秋不用犧  
牲臣愚以為肇慶廟為聖祖始祖之廟則當用  
先儒說祭以冬至備其牲牢庶為合禮矣識者多疑  
之尋以徑遞不果上丙寅九月洋賊陷江都時公在  
家遘疾未克奔問乃上疏言臣竊伏念目下艱虞之  
狀岌業之勢不可以寇退而有所弭慮也噫我國居  
日出之東彼國居日入之西初非馬牛之風及也有  
異野倭之接境也而濱海萬里敢生窺闖之心欲肆

吞噬之計潛蹤匿跡於村里誑誘愚民傳布邪學賊  
國中之虛實察山川之險夷顧其凶謀秘計有非一  
朝一夕而在今日恬嬉之餘懈弛之時數隻番舶如  
入無人之境其來也莫有禦之者其退也非有摧折  
者况有交通奸細之類潛招暗導有指疆土者乎且  
此賊以舟楫爲家居寇掠爲耕作普天之下無不在  
籠絡之中無不被恐赫之術囊括其珍寶漁獵其少  
艾一片乾淨地唯我東國在耳彼其朶頤沅澁積有  
年所而彌兵自此始矣構釁自此始矣此正君臣上  
下深謀遠慮結爾戎兵修我戈矛以待事變之時也

在昔先正臣李珣遙請養兵十萬以備緩急且曰一  
朝變起不免驅市人而戰則大事去矣夫在我 宣  
廟盛際猶尚有先事之圖况今寇賊現形禍亂已作  
之日乎臣聞物不素養不可以應卒孔子曰以不教  
民戰是謂棄之孟子曰不教民而用之謂之殃民苟  
無素養之兵先教之民而倉卒有急臨陣對敵則未  
有不敗衄者矣臣愚以爲朝廷差出召募使使召募  
諸道精兵都城二萬八路各一萬以充十萬之數而  
無事時使之安意作農以春秋農隙講武習射教之  
以坐作進退之節申之以親上死長之義及其有事



使之屯守各其道沿邊要害處與官軍共張聲勢相  
為應援國有重兵邊圉有守則外寇不敢生窺覲之  
心下陸之計矣然召募之際苟不得人恐有擾民病  
國無窮之弊自召募使以下至列邑有司不拘前啣  
與幼學另擇其有學識才請公廉勤謹一諾所信服  
者任之募兵之際另抄其有兄弟田宅根蒂溪固者  
既募之後烟戶諸役一切蠲免錢布之徵初不舉論  
目前無征戰之苦有支生之望則庶可有應募之民  
無騷擾之患矣我國武備極為踈虞兵制未得周詳  
軍丁一發誅求隨至使之納價布馬有雜費焉步兵

所納因為布名閩帥邊將以布之多寡為任之饒薄  
夫使異日赴湯蹈火不避死地之民納錢納布侵虐  
多端如是而責其親上死長古今天下寧有是理耶  
批曰所陳切實爾須上來就議廟堂尤好戊辰陞通  
政例授敦寧府都正兵曹參議尋以善居鄉特除漢  
城府右尹進秩嘉善歷都摠府副摠管承政院左右  
承旨 經筵特進官兵曹叅判同敦寧同春秋乙亥  
又疏請申嚴科舉法槩以擇主試之人立面試之法  
若有高尚肥遯不肯就試者乃以別薦登 聞為永  
久遵用之地 批曰所陳當留意矣丙子進階嘉義

壬午正月寢疾題一絕詩示左右曰聖學如今盡發  
揮當時凶咎契于龜鳴呼有溺其何淑黎庶吾東盡  
變夷蓋傷時之意也乃以初六日卯時考終于綾州  
之坪村寓舍壽七十五訃聞 上賻祭如例三月十  
五日塋于同福外南面花山坐卯之原齊貞夫人濟  
州梁氏顯永女姿性順厚勤儉稱其宜家先公六年  
卒育一男一女男塋生員克趾先美受業於鼓山任  
祭酒門下文學風儀冠絕士流不幸早世女忠州朴  
源佑塋三男二女男大鎬肯鎬用鎬女安極許榮朴  
源佑二男三女男珣柱琦柱女鄭雲興高某餘幼公

容貌端重長不踰中人豐準大耳雙眸炯炯望之儼  
如郎之温然天性孝友前後居憂哀毀過甚歛殯饋  
奠克遵禮制間日展墓未嘗以雨雪或廢外祖考妣  
墓各在遠地且無嗣金夫人塋後以遺命即爲移窆  
於其側又置祭田以供香火與伯氏上舍公友愛甚  
摯朝夕圍聚或作文或論事至老不倦值喪餘飭外  
內務使精潔日豐約當稱家有無誠敬豈非在我者  
耶教子弟以義方其有過失未嘗少貸而亦不以忿  
言厲色加之雖僕隸賤人不輕加呵責賓客往來不  
拘親疎必敬以叙禮動止有則偏倚之容不設於身

惰慢之氣不形於色嘗以為學問非別件物事凡日用云為皆是吾分內何必兀然終日讀書然後為學耶又曰為士者當及時勉學以蓄其德餘力治文以達其才充積既厚自當有感通者矣出而事君則出謀發慮憂國奉公常以濟世澤民為志其有不合則奉身而退以寓古人不可則止之義可也平生志不在溫飽澹然調度往往有人所難堪而處之泰然嗚呼公以明銳之資加篤實之工自經子百家以至醫藥卜筮名物度數古今沿革莫不痛究源委蘊為德行發諸文辭者無非扶植世道羽翼斯文之格言至

論如百里鏡太平策傲原道直中瑣言等篇皆根據朴實可傳無弊至於中和明德理氣之辨雖未知其一符合於程朱法門而其喫緊咀嚼切至體認之力尤不可誣也性愛佳山水於瑞石曹溪白雲智異等處足跡殆遍翛然有出塵之趣及其老衰取古人詩句九章又三疊精寫一冊置之几案日以沙上琴操每花辰月夕諷詠自樂曰昔淵明之琴無絃今沙上之琴無形手中無有琴徽而口中只有琴操無知今世亦或有子期之知音小山之招隱否耶只俟後世之子雲堯夫云蓋既歿而孫大鎬等謂益鉉有後

生同朝之諛猥託以紀實之狀顧人微言拙雖不敢  
賞竊惟 景陵之末去古未遠遺澤尚存時則有若  
梅山洪文敬公以老成宿德矜式國中四方雲集彬  
彬有洛建之風公早得依歸篤信師事有以知公私  
大小之別而為沒身得力之地兼又濟之以奇蘆沙  
任鼓山諸長德為其後先切磨輔益則淵源門路已  
極正大而磊落矣釋褐二十餘年歷啟臺省平步卿  
月而一不向權貴門作依阿軟熟態世俗奔競視之  
若浼而辭受取與惟義是規則又所謂進退不苟之  
古道也遇事盡言言必有中無非為國耳公耳利害

不計之地苟使當日柄臣能用其言顯其身不視以  
常談死法而次第施行則中外士風庶可不變而千  
年 宗社亦不如是其倒懸矣嗚呼唏矣因序其世  
系行治官閥及立朝以後論事大略以告世之立言  
者

咬菜窩閔公行狀

驪興閔氏咬菜窩諱百焄字郁之初諱百燭其先顯  
自高麗如平章事文景公諱令謨尚書公諱湜都僉  
議政丞文仁公默軒諱清炳載史乘不須譜也至我  
莊陵之世執義諱懷參以 定順王后親黨被柙遜

居綾州之月谷與縣監文公自修 贈承旨梁公以河  
相友善且與之裁定一邑規例如儒宮民庫鄉約農  
社等節勸率民俗後以鄉先生祭社之義立祠以俎  
豆之於公爲十世以上高祖諱彭齡丙子勤 王卒  
贈童蒙教官曾祖諱後衍祖諱濟益 贈司僕寺正  
考諱相東 贈左承旨世以文學相傳偉行邃德誦  
在鄉邦兩代追榮以姪子胄顯侍從恩也妣驪陽陳  
氏聖彥女婦德克備事君子無違禮以 健陵己亥  
四月干支舉公公自幼聰穎嗜書若膏梁功令文字  
各臻精銳屢捷鄉解無命不售家本窮約能事親以

禮歲月準備香火排置井井有條緒兄弟三人伯氏  
早世與仲氏友愛甚摯出入居處不相暫離座客常  
滿談經論事亶亶不倦不知世間有何樂存焉已而  
訪剛齋宋先生于懷川留止旬月叩質疑難先生大  
加獎誦贈詩有講學吾無得論文子有餘之句自是  
充然若有得每日早起展謁家廟退坐書室敬對方  
丹儼乎若上帝之下臨又以讀書窮理以廣心知訥  
言敏行以實身踐孝親悌長以本行仁慎終追遠以  
盡報本內謹閨闈以造端外交英俊以廣遊力穡勤  
績以厚生節衣縮食以足用嚴教子孫以裕後寬御

僮僕以任事十條書銘座右晨夕寓目而警省焉謂  
心經一部是千古道學之授受要訣亦我靜退而先  
生之表章篤信比於四子近思之列者也只原附註  
外許多義疏各立門戶會通無編不能徧觀而盡識  
則非細事也爰取我東諸家書凡有議論及於此經  
者罔不萃輯載錄於各條之下其有未備者又足之  
以古傳記積以年歲始脫藁名之曰心經集解於是  
辭句之艱晦者明議論之叅差者備末學之研究經  
年而不可必得者瞭然在一開卷之間若羣賢並在一  
堂之上耳提而面命之苟非力量之大聞見之富

不能及此殆溫公所謂平生精力盡在此書者也又  
有洪範數辭一編多發前人所未發筆法勁健所騰  
經史為數百卷精力過人老境亦作蠅頭字少不迷  
錯善於教人待而成就者甚衆享年七十三卒於  
哲宗辛亥八月九日始葬寶城白沙亭後三十三年  
癸未移窆于同福外南面六月山坐甲之原齊羅州  
林氏世鎮女姿性柔順勤儉治生克成家業卒後公  
十二年墓合祔育二男一女男長時顯次三顯女朴  
原應時顯男墉女奇世鉉趙秉喆宋秉鎮三顯男學  
塲女李基璵李龍憲柳永玉墉一男幼墉取再從兄

生員埽笏四子洛鎬爲後女鄭雲松壻男昌鎬女崔  
在杓尹某鄭某洛鎬一男二女幼洛鎬飭躬潔行克  
趾先美千里走書猥以家狀見示因託編次爲文余  
辭非其人而顧以尊祖敬先彞情所同遂不敢終辭  
第加櫟括視原狀殆十之一云

節度使許公行狀

公姓許氏諱東岵字震伯號蓮塘金海人以三重大  
匡駕洛君諱琰爲始祖高麗之季典理判書兼藝文  
館提學諱篋棄官遜居于嶺南之丹城大節偉然於  
公爲十世高祖諱公綽有孝行官至三嘉縣監曾祖

諱裕 贈通禮院左通禮祖諱國柱壬辰舉義錄宣

武功 贈兵曹參判號觀瀾考諱珪蔭軍資監正

贈戶曹參判妣載寧李氏進士喜益女 萬曆辛丑

舉公公風骨殊凡十歲內外荐喪父母執禮如成人

動止有法度權東溪濤見而竒之勸令就學及省事

慨然歎曰丈夫有志當立身樹功名何用屈首劬經

做老措大事業而已遂從事射御以 天啓甲子登

丙科丁卯虜警調濟用監主簿扈從江都陞授六品

職由備邊司郎廳轉訓練院主簿都摠府都事外除

爲載寧郡守歲餘遞丙子南漢之役慶尚右兵使閔

棟敗歿于雙嶺 上因道臣啓請特差公宣傳官代  
領其衆多戰捷功事定罷兵歸第常撫劍激昂有頭  
上有天懸日月眼前無地讀春秋之句已卯拜昌城  
府使昌於彼地接壤也華人孔枝秀義不臣僕於清  
脫身來附而譏捕旁列公謂此先聖後裔 皇朝遺民  
豈容坐視使彼虜甘心豕豕遂多方庇覆俾得全完因  
贈詩曰萬古尊攘義中華問幾人子真孔氏裔我亦  
大明臣天地何長夜男兒歎不辰相逢東海上許以  
死生親又曰如君清絕見來稀其奈王風掃地微若  
使宣尼當此日乘桴浮海亦東歸辛巳移除金海下

車之初加土納陵特牲以祭修改聖殿及兩陵門丁  
亥陞通政為釜山僉使申明要束番倭懼伏因節次  
推遷歷甲山長湍肅川永興府使黃海全羅南北二  
道兵馬節度使及其晉秩嘉善再任南道而解紱家  
食則寔 寧陵即位之九年戊戌也當是時 上將  
伸大義寤寐豪英嚮用尤齋宋文正先生先生感格  
知遇密陳修攘之策又極選文器材略可堪依仗者  
李滉等五人對揚 聖旨而公居其一是謂關西五  
虎將 顯廟嗣位念公以 先朝舊臣 恩賜頗仍  
辛丑由副摠管為平安兵馬節度使壬寅差訓練中



軍特授摠戎使除命及門而公已病矣因其年五月卒于京邸享年六十二訃聞上賻祭如例返塋晉州勝山洞先塋側公卿士大夫多誄奠以送之以宅兆不利後九年庚戌移窆州東用奉里山旨洞坐子之原公性簡重恂恂有學士風律已率物人咸敬憚蚤失怙恃終身孺慕雖位至通顯年既耆艾而自奉簡薄衣無兼副食不加品第仲豈亦自樹立官至守宰而每隨事教導不使其昵近權門長於吏才公廉剛介雄府巨藩遊刃恢恢吏不能欺民不能忘去後類立石以頌之公之側室與自點之妾兄弟也

自點每要納款輒拒而不受庶子昌武勇絕倫慮其爲逆堅聞知汲引則又送歸鄉廬俾免濡迹及兩賊伏誅人服其先見確如也嗚呼今去公之世殆近三百年文獻斷爛行治可攷只賜祭文郡邑誌寂寥數語而已者殊可恨也然公以折衝禦侮之才值冠屨倒置之日歷試中外名實相副主知人望蓋千載一遇雖仙馭遽賓事功未就而遺韻餘風可傳可攷則不賢而能之乎聘巴山李氏郡守應星女生於萬曆丙申卒於寧陵戊戌墓合祔夫人端嚴有婦德公遊宦四方整理家事教養子弟內助居多云育

三男曙晟武府使晚側出三男二女昇昌並武科仲  
晶女申汝近郎廳元萬東孫繕及第糾長房出綬及  
第二房出綸紳徽三房出昇二男純萬戶統進士女  
尹沉晶二男縉統生員昌一男縉女梁鎮邦九世孫  
萬濟萬膺千里躡躡謁以狀德之文余謂公之樹立  
誦在家邦無用架壘且夫山野疎淺不足輕重何敢  
率易秉筆取人冷笑以是固辭而其懇益摯因竊念  
公之事實牢落光鮮足以警發頽俗而見今天地崩  
陷日月晦蝕一線民彞無地可講則其撰次成文以  
諭來世可急而不可緩也顧家傳狀文稍成部居而

疑若不經行人東里遂不揆僭越妄加隱括如右云  
雲溪先生黃公行狀

本貫全羅道長水縣

高祖諱允恭 贈大匡輔國崇祿大夫議政府左

議政兼領 經筵春秋館事

妣南陽房氏 贈貞敬夫人

曾祖諱進折衝將軍守忠清道兵馬節度使 贈

崇祿大夫議政府左贊成兼判義禁府事謚武

愍公

妣晉州蘓氏 贈貞敬夫人

祖諱廷說通訓大夫行巨濟縣令兼金海鎮管兵馬節制使

妣慶州金氏淑人

考諱躋奉正大夫守平壤慶尹 贈嘉善大夫吏

曹叅判兼同知 經筵義禁府弘文館提學春

秋館成均館事

妣南原楊氏 贈貞夫人

先生諱信龜字錫汝黃氏系出長水世居南原之池塘村以其嘗寓鳳城之白雲川學者稱雲溪先生始祖新羅敬順王駙馬諱瓊入我 朝翼成公諱喜有

經濟才佐 三朝致太平入到今稱之贊成公死於

王事為國家中興之基本叅判公丙子舉義有戮賊

功追 贈吏曹叅議今 上壬辰特 恩加 贈旌

間先生以 崇禎六年癸酉十二月十日辰時生于

池塘里第自幼聰明善記七八歲能綴詩有不是炎

風蒸宇宙安知蕭瑟碧松響之句十四五已知有古

人為已之學以死踐履之方曾因善病常自警飭曰

夫病不治則死而君子之所病抑有甚於死者故余

不但以已病為病亦以君子之所病為病也手撫經

傳要語編為一書名曰內省錄甲午以後連丁內外

艱皆廬墓盡制既除慨然歎曰前日場屋為親屈也  
今不可以已乎於是盡棄俗學求仁為己用志不分  
謂貪多務得學者通愚惟簡而易守約而易知者莫  
如大學中庸每日將三五段字求其訓句索其義潛  
思默誦晨夕慥慥及其所造益溪所得愈切則筆之  
在書類通明演迤縝密綜核而多箋註所未及者所  
著有小學會疑庸學顛疑等篇又有坤復論無是餒  
辨明典說暨禮疑問答數十條皆可傳之無弊 肅  
廟初年鑄黨用事滔天之禍濫觴禮訟已亥諸臣次  
笏被逐而尤齋宋先生荐棘南荒尋有告廟之論本

道諸生欲辨其誣屬筆於先生先生乃草定一疏力  
陳聖人制禮之本旨破許穆析句誣經舞文弄奸之  
心術以及國家好惡賞罰之失正奸凶輩納媚固寵  
壅蔽 聰明之情狀前後數千言言甚切直以寓其  
草野孤臣畢義願忠之意庚申更化大臣薦以經行  
除 顯陵參奉呈狀辭遞壬戌除忠清都事旋陞六  
品職為造紙署別提並力辭不就雅愛佳山水移寓  
白雲之良谷城市隔遠泓淨幽邃有琴臺洗耳溪小  
砥柱之勝常幅巾道服風詠徜徉有粹然出塵之趣  
未幾伯氏察訪公下世遂還故土構數架蓼溪之濱

龍山之坂扁以山水日與金澹虛之白柳念修震錫  
崔持平是翁李石洞文載尹侏道義相孚講磨麗澤  
不知老之將至享年五十三而以乙丑二月三十日  
庚申考終于正寢門人知舊加麻者數十人計車所  
及識與不識莫不咨嗟相吊以爲儒門不幸矣先生  
嘗謂我之一身知大於天地萬物然後可展拓充得  
蓋蓋有天地然後有父母有父母然後吾得以生焉  
而君以養之師以教之是天地也父母也君師也將  
舉天下之大而莫能加焉不成說吾身便大於天地  
父母君師矣然自吾一身受荷之重而論之天地得

我而安其高下之位父母得我而享其安樂之福君  
得我而保其子孫黎民師得我而傳其道焉然則天  
地父母君師無我則不得成其大焉又謂天地若是  
懸空茫昧與人無干涉雖聖人亦何得而爲易象卦  
爻而著其微遠之理與人事相維持哉今之君子却  
能讀書而於天命之性一事反規爲茫昧不可究之  
物冥然恣行無所忌憚此皆自甘罔生而爲天之棄  
物也其自任甚重範圍宏大而洞然於天人合一之  
效者如此又謂親切二字先賢此語不可從皮毛上  
見得蓋知上有親切行上亦有親切雖知之而揣摩

摸擬不如傷虎之真知可畏則不可謂親切雖行之而牽強苟且不如臭色之誠可好惡則不可謂親切親切二字索性知得親切亦可謂長得一格又謂程子言學者當學顏子孟子才高學之無可依據先儒以明道比顏子伊川比孟子然以兩先生觀之學者當以伊川為法而明道似不可學蓋顏子從博約克已上用功而止故使人有依樣之方孟子勇邁超絕知言養氣難由階級故使人未易下手學之難易固然然而明道氣味似顏子而德性寬大規模廣濶其行已接物之道自然和易學者無把捉遵襲之跡伊

川嚴肅雖似孟子才高不如孟子而其踐履篤確平實都是敬以直內義以方外之學故學者有箇持循得力地也其反已務實用力喫緊而不安小成又如此又謂師無定位隨道之所存而實不出於五倫之外道在於君則君為之師道在於父則父為之師是以有君師父師之號非但尊者為然在卑者敵者亦然故君之於臣有學之者有事之者學者之於朋友相觀而善者皆有師道也又謂古之學者必自身而家自家而國故有本有序身修家齊國治而天下平矣後世之學者却倒用了必曰天下國家而自家一

箇身與心都没理會今國家設場屋策問治道操觚  
執簡之徒無論黃口白髮皆縱橫闖闢說古談今陟  
王黜霸咄嗟指顧之間似若陶鑄唐虞三代之治可  
謂盛矣然夷攷其所自成就則其有得於躬行心得  
而不為入耳出口者有幾人歟國家以是虛張朶言  
取人之名而實安於自欺為士者亦以是為榮身利  
家之資而不愧欺人其相率而為偽者孰甚於斯云  
者則又其親見於師生道壞士趨奔競而致慷慨歎  
息之意也夷攷其平日行治則衣冠不詭於俗論議  
不強與人爭辨冲淡和易一任真率夫婦而和敬相

孚兄弟而友愛彌篤喪致其哀祭致其敬族黨親友  
無間親疎各有恩義處約食貧不給蔬糲而晏如也嘗  
不必由諸已好不啻自其口聞人善雖在卑微贊揚  
如不及見人惡望望去之若將浼焉接引後學隨才  
施教各有攸當而絕不如世俗人雇傭耳目循守塗  
轍之為者故雖至愚鈍根咸有所感發振刷次第得  
力至其疑難之際亦必反復諄諄叩其兩端對人接  
物不設畦畛而至義理必爭之地類嚴辭正色不少  
撓改至其年齡漸高而充養益盛則從容舒泰而不  
見其生受崇溪廣博而不見其涯涘是以遠近入士

之有志向上者莫不注意傾慕仰之如山斗中外公卿大夫聞風造廬者亦皆折節起敬諮訪取質或疑其果於忘世而有語云云則輒有詩曰若報黃河清已了湖邊何守白鷗盟此其平生出處造詣之大畧也初葬于府南水旨尋以宅兆不利移窆楓山先塋某坐之原配李氏籍青海一女適崔與三金氏籍扶安二女張俊尹行敏也無子以弟任龜之子戡爲嗣比世單子逮至祖免勝冠者四五十人蓋先生旣歿門人子弟收其遺集爲若干卷七世孫瑩八世孫龍顯謂不佞或有一得之見且聞敬人祖考同其祖考

之說袖其遺事謀所以刪潤叙次垂諸久遠者竊惟先生以忠賢顯閔早絕功名之業廣衡泌之章終世丘園簞瓢自樂於一切榮利紛華不以介意者已見其所存所守之自有定本而不可移易矣及其晚年朝廷公議頗有接引試可之意而其介如石其遜益肥講服經禮到老彌勤至其惓惓於斯文之顯晦宗國之綴旒扶護大老先生在積陰羣猜之中者尤見其義篤尊攘至死不變之大勇也是則先生之精微蘊奧雖非後學淺見所可彷彿而其大本大經之著現者如青天白日之不可掩而智愚之所同見也



不揆僭易遂讓括如右以備秉筆者裁擇

贈成均館祭酒履齋李公行狀

公諱運榮字穉明李氏系出慶州以新羅佐命大臣諱諤平為始祖屢傳至諱金書為高麗開國功臣歷十四世諱齊賢門下侍中諡文忠世稱益齋先生四傳而諱曉我 朝吏曹參判 贈吏曹判書大提學號清湖清湖曾孫曰思均吏曹判書 中宗己卯入趙文正黨卒諡文剛有諱珣以經行薦南臺為持平號松陰栗谷李先生撰墓誌諱穗通政僉樞受業尤菴宋先生門自號安素翁生諱行善蔭工曹叅議郎

公五世祖也高祖諱侃蔭縣監曾祖諱重茂蔭副正兩世皆被 景宗辛壬禍編配南北 英祖初元蒙宥縣監公除翊衛司翊衛不就遂屏居于積城之芝谷自號芝軒祖諱孝源通德郎考諱益秀早世妣杞溪俞氏直長漢復女忠愍李公義洲外孫也本生父諱恒秀母義城金氏考述曾依仁齋進士時準孫也以 正廟丁酉十一月十七日舉公于芝谷舊廬幼而出為伯父后俞夫人鞠之儀容清秀姿質純美嬉戲設俎豆習禮容九歲就學于依仁齋之門金公即陶菴李文正高弟也授以小學孝經公聰穎絕人篤

在課誦又能以灑掃應對之節為踏實工夫是歲本  
生母夫人病革公斫右手血灌之得甦三日而平公  
哀痛幾不全蓋公篤孝自幼已如此明年丙午遭王  
考承重喪致哀受吊儼若老成見者莫不稱歎俞夫  
人粵在早孀絕粒七日因成虛勞積年沉痾醫言宜  
用人乳公往乞鄰之乳婦辭氣懇款乳婦感其誠常  
與之及娶婦生子以其乳乳之戊午俞夫人宿祟添  
劇公不解帶而養嘗糞禱天無不為已至危境則割  
左手無名指用其血得甦公愈益憧憧凡係飲食藥  
餌之奉者必極力得之不以貧故而有闕翌年春俞

夫入招公諭曰今則吾病漸已而念汝廢學久吾兄  
方在公州任所汝勿以我為念須往學焉公難於離  
闈而又重違親志不得已往從之未幾日夢拜親闈  
悟而遍身流汗公即束裝固夜馳歸則俞夫人病已  
不省矣又斫指灌血得保數時而終時本生父患勢  
亦危公又欲割指傷人已藏錐刀之屬乃納手門隙  
而取血灌之復甦三日竟卒聞者皆驚曰四朔間三  
斫指於古孝子亦所罕聞家本至貧賴有舅氏資助  
歛葬能如禮無憾廬于墓側晨夕哭拜本生父墓距  
家十里日必往省不以風雨寒暑而或廢兩墓蒞當

膝處皆成坎制閔又追服本生父心喪蓋當日並喪不能盡情文故也雖非禮經所許而識者或多原其情焉既就吉公時年二十有五而本生所後皆永感公喟然歎曰吾今風樹纏慟雖榮奚喜與其朮難得之富貴不如從吾所好遂絕舉子業抱經請業于楓溪韓公啓增之門韓公亦陶翁高第乃授公以四子心經性理等書公勉焉孜孜晝夜不怠探賸微效多所獨得因以履齋自號蓋有意於履實也同門諸公咸推莫及而韓公亦待以少友晚以經學純篤被繡薦者三再擬寢郎楷枚數雖不克霑一命之啣然少

不以窮達爲意牢守林樊講學愈篤焉乙未夏感寒疾公自知不起招諸子遺囑孝悌忠信及友愛兄弟敦睦宗族數件事而已不及家事遂以五月初九日丁卯考終壽五十有九訃聞遠近皆嗟歎九月塋于坡州坡平面豐德洞先塋負子之原 憲宗癸卯京畿觀察使李公若愚以多士言啓于朝曰李某以名碩之後有孝行經學其在 朝家崇儒彰善之政宜施褒贈之典 哲廟甲寅始因相臣趙公斗淳奏特贈司憲府持平今 上朝丁亥又以沈相舜澤奏加贈吏曹參議兼祭酒贊善噫死生雖殊榮顯無異後

人之於公亦可謂無憾矣公質厚而才敏外明而內  
寬暴慢不設視聽無邪終日跏坐如對神明日必冠  
帶拜于家廟退而應接事物舉止凝重衣冠整肅圖  
書滿架浮雲富貴惟以窮理力行為畢生計以早孤  
懷至慟事季父如事父平居侍立終日不命之坐不  
敢坐不命之退不敢退事無自專必稟而後行刑妻  
有矩教子以義閨門之內斬斬如朝廷而藹和之氣  
常溢於家庭奉祭極盡其誠每值喪餘必宿齋戎致  
思致敬及將事皇皇如鷄斯日哀動傍人若有故不  
得祭則必燃燭達夜淚簌簌沾襟敦於宗族不以疎

而有忽敬於接人不以狎而有慢御僮僕曲加恩意  
處鄉鄰務盡謙恭每歲春祀必書孝悌忠信四字及  
斯干詩式相好矣無相猶矣八字以揭于楣曰我亦  
未嘗不求福而求福不回是余心也此則公飭躬御  
家之本實也若其學問則得聞寒泉為學之旨於金  
韓二公門路既正踐履益篤常以黃勉齋理精於神  
神精於氣理神合而為心之說為論心之妙諦又以  
朱夫子一物各具五行之理之說為論性之肯綮而  
其言曰心固氣之精英而自與氣質之氣不甚關係  
是以或有氣病而心不病者或有心病而氣不病者

此可驗心非氣也又曰理氣元不相離而以賦於人者論之性即理之未發也情則理之已發也心則統性情之發未發者也心之為物其氣即五行之氣其理即五常之理其體仁義禮智其用惻隱羞惡辭讓是非其發原於性命之正則為道心生於形氣之私則為人心心本無二在在或原或生之異故有人心道心之別何嘗有發於理發於氣之殊耶發者氣也所以發者理也道心之發固理氣之用事而人心之發亦理氣之所使也如或認氣而為理遺體而言用不亦謬乎於禮則一以陶翁所著四禮便覽為準則

而參用以朱子家禮至鄉飲鄉射亦皆講習作為圖式於喪祭二禮尤加致意並有著說若文章雅不屑為而又不收蓄故只有詩文若干及易序心說等數篇常言洛閩以來吾道遂東靜退栗尤諸先生允為傳心之正脉云者又其實見造詣之大畧也配贈貞夫人隋城崔氏考疇錫以英廟甲午生端莊靜淑事舅姑婉而順奉君子和而敬朝夕必上堂乳姑俞夫人常稱孝婦族戚有喪輒過門者必吊服望哭人皆以女士稱之卒以庚辰十二月二十九日辛亥塋在芝谷巽原距公墓數弓地也男長圭潛生員蔭

都正次圭鎮過房次圭憲季圭復蔭知敦寧女適洪  
晉謨俞致秀圭浩一男鍾學早卒圭鎮繼男鍾喆進  
士圭憲男鍾喆過房鍾奭鍾翊文科壯元承旨女適  
進士尹晦或都事李承鶴圭復男鍾浹文科校理女  
適進士洪承靖鍾學男承雨早卒鍾喆男卿雨進士  
女適叅奉俞鎮郁鍾奭繼男會雨鍾翊男會雨過房  
明雨餘幼女適注書閔廣植鍾浹男晚雨女適俞麟  
濬承雨繼男相慶進士嗚呼士之所以得名者以文  
行具備也然末俗哓哓務行者鮮士之所以不如古  
也若公者豈非古之所謂士者耶士之行非一而惟

孝爲百行之先若公者豈非古之孝者耶古稱鄉先  
生沒而可祭於社若公者豈非其人也耶祀孫相慶  
以知敦寧所撰家狀來謁狀德之文余老耄久不事  
筆硯然聞公之行觀公之蹟與世之逐逐於文而不  
務實行者有不可同日語者且念我曾王考嘉陰府  
君實師有心齋李先生和甫李先生亦陶翁高第也  
以吾兩家學問淵源之同有不可終辭者遂就原狀  
節略如右以告世之知德者攷焉

勉菴先生文集卷之三十七

勉菴先生文集卷之三十八目錄

行狀

贈戶曹叅判金公行狀

訥軒愼公行狀

箕菴金公行狀

孺人光山李氏行狀

成均生貞梧岡文公行狀

竹軒文君行狀

贈童蒙教官全公行狀

剛齋李公行狀

贈童蒙教官鄭公行狀

崔芝厓翁行狀

聿修齋朴君行狀

長湍府使田公事狀

假監役畏窩崔公行狀

僉樞鄭公行狀

迪順副尉韓公行狀

默齋金公行狀

恥菴李君行狀

敦寧府都正心巖文公行狀

同敦寧尹公行狀

右副承旨金公行狀

司憲府掌令尹公行狀

忍齋尹公事狀

愚山鄭公事狀



勉菴先生文集卷之三十八目錄

勉菴先生文集卷之三十八

行狀

贈戶曹叅判金公行狀

公諱桓榮字聖行農隱其號也金氏系出新羅有王子興光知國將亂遜于光州為氓庶子孫因籍焉麗朝益昌大連八世為平章事入我朝司僕寺正諱孝宗號迂翁莊陵末棄官遜居湖西之鴻山引義自靖金東峯贈詩有萬壽山前途故人無言無語閱三旬之句配享清逸壇曾祖諱九齡祖諱壤孝學贈持平旋間考諱若欽贈左承旨妣李氏籍延安

考春芳公幼而沉重不與羣兒戲父母有所賜雖薄  
小之物必取其稍勝者讓與諸兄弟長老會談每侍  
側敬聽里巷汗雞輒逡巡退避凡周旋動止不待教  
引儼若成人及長事親以禮恒和氣怡色先意承志  
父母老命分門以居之土田器物自有區別乃一切  
不居只以小鼎斗粟曰吾兄一家長房擔負甚重不  
容分貳致難堪當也遂勤儉自力菲衣薄食而為親  
致養一如同居時及丁憂不御酒肉不釋衰經顏色  
之慼哭泣之哀三年如一日雖卑賤見與父母同年  
者必禮待之人家壽筵或有見請以親年之未及周

甲輒愀然傷感權謝不赴既而兄及弟俱歿孤姪寡  
嫂漸不能家又鄭氏妹寡貧子幼無所於歸公乃一  
心勾管左右拮据絲身穀腹俾免飢凍終身無怨咨  
聲少貧甚不能專力文字而性本好書買書至傾朝  
夕儲為子孫肄業地或謂子素清寒何不以營產菜  
為長久計耶公笑曰此乃仁耕義耨之根本田地且  
不云遺子籟金不如一經乎晚年貲稍饒先墓石儀  
未遑者一並新備婚葬過時者正供米輸者皆隨力  
應副值歲歉貧交窮戚踵門成市公盡心酬接與家  
衆無異同及春告歸各計其土田多寡施穀種有差

未嘗有絲毫難吝色教子弟常曰愛親敬長存心養性勤學問節嗜欲衣冠必整齊步履必安重言語不得輕鄙坐立不得放弛執事以敬行己以正母敢欺情無與人爭聞義則服不計幼賤有過則改無所憚吝如是做去久而靡懈方是儒者事汝輩勉之又曰私門用刑亦關禍機切宜慎之嘗手植墓松課日巡視過宗孫或尊門或旋門之家雖夜必下馬蓋其平生事事言言繩尺斬然無愧為小學中人生以丁卯八月卒於戊寅四月享年七十二追贈嘉善大夫戶曹叅判兼同知義禁府事配高靈朴氏震亨女男

長箕八以孝友聞官同中樞次箕條孫在厚在奎在彥曾玄不盡錄在厚等以行錄一通示不佞徵狀文辭以人微言輕而不獲則謹叙次如右以待立言者考信

訥軒慎公行狀

公諱炳鏞字希中居昌慎氏其先宋開封府人有諱修隨海舶東來仕麗朝為司徒左僕射自後世有衣冠入我朝有諱以衷贈右贊成娥林府院君諡襄烈諱幾全羅道觀察使諱後庚集慶殿直聘崔烟村德乙女子孫仍居焉即靈巖之永保村三傳至

諱喜男禮曹叅判以文學清白見稱於世諱餘慶尚  
衣院判官諱光翊成均生員甲子舉義諱聖弼號敬  
菴有孝子名松公六世以上高祖諱昌鼎曾祖諱師  
典號觀湖祖諱王顯考諱在哲號松菴並有行義妣  
光山金氏思國女公以 純祖戊子三月二十六日  
生自幼聰穎邁倫受小學要訣等書能略通大義及  
長從先生長者學聞居敬窮理爲己求仁之說便受  
而爲己任晨宵勤劬如恐不及事二親雖甚貧甘旨  
不匱問寢視膳暫不離側居喪哀毀甚居處飲食一  
遵古禮寧或過之而無不及焉墓在三里而遠日必

省掃不計風雪值喪餘必宿齋蠲潔躬親行事至老  
如一日其孝誠純至天性然也始松菴公從遊一時  
賢士大夫聞見廣博造詣精深經子百家皆所淹貫  
而於禮書用力尤專嘗蒐葺古今變禮名曰禮疑纂  
輯行之於家而及之於人又以人一己百人十已千  
之訓恒戒其子孫曰能如此而不能變化氣質者未  
之有也公佩服嚴訓罔敢失墜自永感以後斷跡塲  
屋專意向上每日謁家廟出入必告有新物未薦不  
先食先公遺文之散在巾衍者纂集中未及再校者  
並收拾編摩俾爲成書所揭諸座右朝夕點檢者四

勿九容與思無邪毋不敬二句也所儲置左右仰思  
俯讀而不厭不倦者心經近思等書及我東粟尤全  
書也故於天人性命之分陰陽淑慝之辨皆剖決灑  
落無所凝滯至人物長短朝廷得失未嘗一發於口  
玩好不接於目博奕不近於手怠惰之幾不萌於心  
傲慢之容不設於身倭洋纖染一切不入於室曰此  
吾先人所禁也何敢近諸嚴在辭受睦於宗黨篤於  
姻親見人過失責之以理期於感悟而遷改未嘗加  
之以疾言厲色此又其行已大畧也蓋公以松菴公  
為父則其得之家庭者固宜如此然苟非公姿稟之

美學問之力何以及此可謂松菴之學不出家庭而  
得授受之正也享年六十二而以今 上巳丑七月  
八日考終於寢計車所及皆曰善人逝矣塋于郡東  
飛鳳燈戌坐之原配驪興閔氏通德馨觀女有淑德  
懿行奉祭祀以禮事舅姑以孝歿先公四年墓各窆  
舉三男三女男長宗龜次宗鳳次宗麟女長適咸陽  
朴燦奎次適慶州崔基昌次適全州崔秉源宗龜無  
育宗鳳二男一女男長濬晟出為世父後餘幼宗麟  
二男幼濬晟以其大人命千里重趼屬以述事之狀  
顧以病淹伎倆無堪為役而曾茲過不自量猥已犯

手於松菴公墓石矣義不容辭安加刪潤視原狀殆  
十之一後之秉筆者尚有以攷焉

箕菴金公行狀

公姓金諱昌模字文叟光山人新羅王子與光之後  
也自是卿相不絕大顯于麗入 本朝有諱瑚官吏  
曹叅判號三慕軒傳至諱珽成均生員號南溪 穆  
陵壬辰以白衣扈 駕龍濟於公為九世曾祖慶壽  
祖相駿考在溲有文行妣延安李氏進士光信女公  
以 純祖壬戌生于長興之糠山里筭自在齠齡舉  
止異常朝夕定省不脫衣帶及長業功令有聲譽見

場屋奔競慨然廢舉業從事為己之學立心制行一  
效古人成法於我東諸賢最慕寒暄先生常曰以寒  
暄豪傑之才篤實之學自稱小學童子况後生之萬  
萬不及者當百倍其功可也遂將聖賢書沉潛反復  
日有孳孳用力益篤而惟以反躬實踐最為之主本  
善事二親愉婉無違甘脆之供不以貧窶而有闕前  
後居憂哀慊踰節日止墓哭非甚雨不廢每晨興謁  
家廟奉祭祀盡誠敬教子姪以義方使之先行實後  
文藝婢僕或有罪過亦善誘之未嘗加以暴怒取友  
必端非其人不與之交婚娶不論貧富只觀其德行

之有無自奉甚薄衣不取華靡食不取甘肥於世間  
嗜好一無所入在在心筆瓢或至屢空而處之夷然也  
晚年等室箕山之陽自號曰箕菴左右圖書樂以忘  
憂與宗族同志人講習藍田緡約長之士風稍振蓋  
公導率之力也今 上丁丑正月十三日卒于寢壽  
七十六墓在寶城王巖海京洞未原配竹山安氏處  
行女牛山邦俊后後配昌寧曹氏世希女墓並附左  
舉二男三女男書煥女安景煥朴承鉉安氏出男貞  
煥女朴作彥曹氏出貞煥出系叔父良模書煥男一  
鉉女鄭在善任二鉉貞煥男治鉉成鉉女安永煥高  
洛柱朴九鉉一鉉男永恭公為人重厚端潔以禮律  
身平居毅然以已心為嚴師目不觀不正之書口不  
道非法之言孝悌著於家庭忠信及於鄉里雖其生  
質之美而學問之力亦不可誣也然而七十嵯巖名  
聲不聞有同幽蘭之萎于空谷而無人賞其馥近有  
儒狀之齋顛而天門阻隔又未蒙褒揚之典雖若可  
恨然不取聞達公之素志也生榮死贈何足為加損  
於公也貞煥錄公行治請余刪潤余病廢筆硯屢辭  
非其任而其請益勤有不忍終孤遂撮其大略叙次  
如右以聽立言者採擇云

孺人光山李氏行狀

孺人李氏籍光山以清心堂諱調元為遠祖大父諱師哲父諱龍河母金海金氏考啓白孺人自幼異凡壺儀夙就父母嘗稱之曰若為丈夫子庶吾門有望十八歸梁氏才入其門生理蕭然多人所不堪孺人隨遇而安一不見咨咨色惟日俛焉以治績務農為事細之被服飲食大而御家接物各有條理事舅姑盡愛敬待君子無違禮鞠養二子雖甚恩自幼釋時教之必有法度少有過差呵責不饒奉祭祀極其蠲潔於宗族鄰里皆曲有恩義莫不以賢夫人見稱以

今 上丙戌九月日卒距其生 仁陵乙酉壽六十  
二嗣子在海等致其事於不佞曰不肖等賴先夫人撫育成就甚勤且懇以及于茲而尚不述事紀實闡發潛謔吾甚怒然不敢寧也敢拜以請不佞感然不敢當又懼文字短拙無以信夫人之德於後世固辭不獲則因竊以為侯夫人之德懿行治固極善美而不有二程夫子為其子亦安能傳芳悠遠百世如一日哉是則孝子顯親別有事在不但以餘人叙述為可了勤也審矣今在海留意問學存心孝友在鄉以松沙日新諸公為從遊又北至白雲山中服勤於重



菴大爺此數君子俱以大賢淵源扶持斯文為世重  
輕者也苟能尊聞行知不為外物時象所搖蕩遷移  
則其將高明廣大於闡先之道無待區區小節而自  
有餘地矣遂彙括本狀十減二三以致勸勉之意

成均生員梧岡文公行狀

公諱喜鳳字岐瑞號梧岡姓文氏其先南平人以新  
羅武成公多省為鼻祖歷麗迄我世有聞人如平章  
爭忠肅公克謙三憂堂忠宣公益漸翰林學士純賢  
公中誠都承旨 贈禮判景惠公和參議 贈吏判  
景肅公尚行縣監勉修齋自修為最著諱潤諱士元

諱昌後連三世以孝行參奉高祖曰仁克丙子倡義  
曾祖曰之望從遊安隱峯祖曰世輝生貞考曰命吾  
贈掌樂正妣咸豐李氏有聲女公自幼溫仁慈詳事  
親也應對唯諾承順如流定省之節脩澠之供勤勞  
之方所以樂其耳目安其心志者無所不用其誠親  
有病涕泣侍側夜以禱天晝以朮藥及遭艱哀毀幾  
於傷孝初終之節一遵家禮謁廟省墳雖雨雪寒暑  
未嘗廢後遊石泉寺見樂正公詩吟聯句在塵埃中  
割紙以歸雖片言隻字未或遺失與昆季友愛篤至  
食同案寢同枕從子遘癘百方救之不但十起而竟

至不救則閉門悲悼不接賓客至三四朔嘗慨然乎  
宗族之經亂渙散成大同譜為敦睦之本聞粟牛兩  
先生陞廡題一絕曰我東文不喪天為兩賢生正學  
何終晦千秋遇 聖明又嘗與諸章甫疏請竒高峰  
院額而蒙 允其遊山詩云下山還渡澗渡澗復登  
山漸覺多幽趣從今謝世間觀於此可以知公行誼  
文章之大略也公生於 明陵癸酉二月二日中甲  
午司馬卒於 元陵戊午七月二十四日享年四十  
六塋于綾州白巖壬原配利川徐氏鳳瑞女婦德純  
備舉三男箕鎮亨鎮舜鎮長房系男永珏次房男永

周季房男永珏過房永瑜永珏男正休卿休弼休泗  
休澤休永周男權休成休顯休一休永瑜男直休以  
下不盡記公嘗曰游於水者魚之樂也飛於林者鳥  
之樂也俛仰於宇宙之間徜徉乎山水之中得之不  
喜失之不憂者是我自然之樂也惟此一言雖若近  
於輕世肆志然蓋其天機真情坦蕩無私則髣髴乎陶  
徵士樂夫天命復奚疑之意如公可謂高於人遠矣  
豈但為一鄉之善士而已哉嘗聞根固而葉茂源遠  
而流長今其後嗣寔繁餘慶未艾者莫非公不食之  
報也公玄孫台煥遠致古道書胎以家狀請余刪述

余辭非其人而但其為先誠篤有難終孤遂據其狀而叙次如右

竹軒文君行狀

君諱璟煥字伯彥文氏系出南平以新羅武成公多首為鼻祖自是圭組蟬赫世有聞人曾祖顯相祖範龍進士有文行父鳳休敦寧府都正號心巖妣利川徐氏杓女光山金氏光欽女君以 憲宗癸卯生自幼聰明正直及長沉深重厚事親也定省溫清養志具甘靡不盡其職事祖先也每日謁廟朔望省楸值諱日必齋戒極致如在之誠待親戚也尤施義於死

亾之際有喪則必匍匐往救使之一遵備要無或失禮其處世也嘗一赴場屋見多士奔競已有不屑之意洛下知舊或勸留圖科宦辭以親老不可遠遊乃浩然還鄉其為學也受業家庭而用刻苦之工讀必達曙尤致力於魯論反復乎曾思二傳探究其微辭與旨有疑難處便忘食默思不得不措恒言讀書窮理將以反躬而力行也不然何用讀書為哉又銘敬義二字於佩刀柄為常目警省之資此其平日事行之大畧也門戶之擔負士友之期望政不尋常而天奪其年遽以今 上庚午八月十六日卒惜乎苗而

不秀非君之謂歟。塋于綾州先塋丑坐之原。齊水原  
崔氏敬國女。孝慈有婦德。舉男一女。一載弘男也。吳  
進洙婿也。載弘四男。濟東濟興。濟巖。濟錦。一女。幼仍  
竊念君之在世。余雖無一面之雅。而至于近日。猥荷  
心巖公晚契之篤。又因君之二弟達煥。奎煥。嘗從我  
遊。風韻典型。不啻甚熟。頃年奎煥不幸早世。余已表  
其墓。又欲狀君之行。而為不朽之文。則汰矣。但載弘  
之託辭甚悲切。有足感動人者。遂依其家錄。而叙次  
云。

贈童蒙教官全公行狀

公姓全氏。諱命普。字景寬。天安人。以百濟功臣。歆城  
君。聶為始祖。歷新羅至高麗代。有顯仕傳。至諱文軾  
始入我朝。官刑曹參判。謚文平生。諱天近。官大司  
憲。生諱思敏。官工曹判書。五傳至諱承文。始居湖南  
之靈巖。又三傳至諱夢台。宣傳官。仁祖甲子。錄振  
武原。從勳於公六世。曾祖聖壽。祖爾龜。考錫祿。妣昌  
寧曹氏。漢挺女。公以英祖丙辰生。天性至孝。自齠  
齒。常在親側。出不遠。遊必有方。應對進退。晨昏省  
定。一以承順親意為務。遭母喪。哀毀守制。事繼母。李  
氏甚謹。無間所生。父性嚴。少恩。薄於李氏。使廢。置別

處絕不飲食公往來服勤供饋水菽一如同室時間  
或迫於父怒有不得自由則摘階前桐葉密齎養  
以供之如是者凡三年父乃感悟遂為夫婦如初父  
李氏歿出入庭除輒撫桐涕泣扁其居室曰梧齋蓋  
寓戀母之義也 正宗壬子卒享年五十七墓在虎  
洞卯坐今 上朝因道啓特 贈童蒙教官配全義  
李氏萬臣女子男四光澤光臣光斗光稷女二宋振  
王朴東垣孫曾以下不盡記噫人性本善皆可為孝  
而但世教廢弛人心陷溺苟非血肉傳禪之地則類  
皆龜勉外樣而愛慕出於真誠者蓋鮮矣公生長忠

孝之門恭修子職固當如是而至其盡誠於異顏之  
母終能感回其嚴父之心則又非夫人所可及也百  
世之後復有如晦翁夫子出則安知不以善事繼母  
之閔損王祥并稱而傳之久遠也歟公玄孫洪均袖  
公實記請余為狀義難以不文辭遂據而第錄如右

剛齋李公行狀

公諱曾圭字乃和其先出自 世宗別子臨瀛大君  
璆歷英陽君涵長連副守終孫潭陽副令忠彰信校  
尉元楨至貴者以孝行卓異為士林推重曰克春曰  
得亨以詞翰筆法闡名曰寅榮曰基白是其四世外

祖全州崔禧億以 正廟戊午十月十一日生美質  
天成內剛外和處已接物未或見過窮交貧族有所  
稱貸輒應副如流雖或施不見報頓無介滯於腦次  
間今 上內寅洋夷寇陷江都中外震懼公謂國被  
外患雖暗聳跛躄尚增百倍之氣而誓不共天况我  
家處地與衆有別舉義討賊不可已也或言手無寸  
兵倘無蟻援如以肉投虎何日吾死且不避况禮義  
大邦喬木世臣草野願忠亦豈無與我同聲而相應  
者乎乃與子姪同姓若爾入定日趨程知郡趙龍熙  
亦助給兵糧旋聞賊退而止以翌年丁卯七月卒墓

在興德二東面龍田後麓噫雖在今日上下大小皆  
以公之心為心則國家其庶幾乎配平海黃氏詰漢  
女有四男二女男長鍾龍鍾儀鍾彞監察鍾廷女適  
姜道會邊義起側室二子一女鍾鶴鍾祿女高時睦  
鍾龍男奉浩信浩璉浩鍾彞男熙淳世淳女適李遇  
鎮鍾廷男王淳奉浩男元春元馥元判信浩男元鳳  
熙淳男元老元庸元生

贈童蒙教官鄭公行狀

近故 贈童蒙教官鄭公河教字伯崙籍海州譜自  
高麗典客署令肅始奕世簪纓洎我 朝壬辰之役

以軍功錄宣武一等勳曰聘壽者其八世祖也高祖  
世演曾祖震伯祖克之考光龍妣隋城白氏師仁女  
曰光義南原梁氏其本生父母以 純祖壬戌十一  
月二日生自少喜讀小學書至古人盡孝處未始不  
三復歎賞家素窶躬耕稼漁樵務極甘旨父有疾晨  
宵洞屬欲其瘳萬方不能終得水魚之感效七年積  
祟及喪三年作孺子慕暑不脫衰經病不進薑桂篤  
梓友于寢食與共二十餘年未嘗變易享年六十而  
卒於辛酉六月二十七日葬在彭城北面內村坐室  
之原噫子而事親彞性所同有善焉者有不能然者

無他即真妄虛實之間爾夫久病難爲子臥起也食  
飲也溲便也凡一動一靜待人而爲者雖日月計焉  
尚難其始終惟一况以年計之而積至七年如一日  
者苟非誠實惻怛無毫髮勉強而能然乎宜其鄉黨  
宗族同然稱誦而無間在父母昆弟之言也宜其神  
助人順達於聽卑之天而有前後優異之典也吁其  
盛矣哉夫人 贈令人順興安氏旭女嘉柔貞正有  
女士風墓附左二男二女長必錫次英錫監役女適  
柳擘全在鉉必錫系男泰珪前昌寧縣監英錫男泰  
珪過房泰珪泰璧泰球泰瓌泰瑄泰珪男德根泰球

男壯根俊根泰瑩男重根泰珣男昌根泰璪男洪根  
泰瑄男啓根內外孫曾不盡錄

崔芝厓翁行狀

曩在東京崔君在鶴日相過從於校村座上謹言語  
好文辭信其為法家典型尋又送我至永川江上臨  
別袖示其大人芝厓翁狀錄囑曰吾先子林壑七十  
年足跡不出於鄉里名聲不聞於州府顧其實行遠  
德誠有不可泯者此非後承輩阿私之言乃鄉閭大  
同之論幸丈人垂矜財擇就加刪潤甚大惠也余不  
能辭受而反覆按翁諱琳煥字性璋其先慶州人以

國初觀稼亭清為顯祖其考曰崙祖武宣薦行五衛  
將年八十階嘉善護軍追 贈考邦憲戶曹叅判祖  
恒大左承旨護軍晚而無育與貞夫人朴氏禱于小  
金剛而生及長語音通明氣格清秀年未成童通經  
史善屬文知功令外有用心處時則立軒韓公運聖  
以惇行博學聞著境內翁就而師事之因以贊見於  
梅山洪文敬公質疑問難亟見稱謝又記其所居蒙  
養齋以贈之自是欣然若有得嘗以為只講經訓不  
如親承音旨閑習禮學不如竦瞻儀形於師門動止  
語默威儀周旋類詳審密察心誠好之如七十子服



孔子於其窮格踐履之方與夫進修存養之節度階  
梯皆喫緊咀嚼或發諸講論或形於文字橫豎反復  
皆言足聽聞內行甚篤生爭墓祭凡子職所當為者  
稱家盡禮罔有餘憾篤於友于同房四十年服食無  
物我家素窶蔬糲難給而處之怡然從學者衆戶屨  
常滿而並因材施教多有成就持身以敬處物以寬  
不必得為在己失為在人故聞風者欽仰觀德者悅  
服蔚然為士類推轂者所云十室忠信一鄉善士者  
殆翁之謂也及其時事一變蹄跡交橫而列聖培  
養之澤羣賢傳授之道蕩然掃地則輒掩抑喟歎不

能自定至對後生輩每語之曰士當斯世須硬著脊  
梁不倒東來西則一線微陽嘗有來復之日矣享年  
七十而以今上三十三年丙申九月二日卒于寢  
塋在治北柯亭里馬龍山負坤之原門生加蘇者四  
十餘人語曰言有枝葉不若行有枝葉若翁之所以  
為翁可攷徵於日用彝倫行事之上而經義遠講論  
說話且當別論以後作家取舍

聿修齋朴君行狀

叻友朴君海量字道謙順天人以高麗開國功臣諱  
英規為上祖歷至本朝世襲簪紱右議政靖厚公

可興大提學文肅公錫命尤著至同知敦寧府事叔  
善於中廟反正元勲忠烈公元宗為叔父以門戶  
盛滿為懼退居湖南之羅州至彰信校尉而恭又徙  
光州子孫因居焉五世諱光純號篤守齋高祖諱重  
元曾祖諱達鎮號栢堂祖諱聖洛考農窩諱鼎鉉妣  
杞溪俞氏考致福君家自篤守齋栢堂公以來世篤  
行誼淵源甚正爰及傍親如遜齋安村諸公師事華  
陽宋文正先生德業風節為世矜式以至農窩公則  
又輕財重義孝友勤儉尊賢尚德為日用茶飯君自  
幼孺染見聞有志向上科場奔競勢津干謁凡世俗

所尚一不掛心惟學問節行為眾所推服而歸重者  
則不計道里遠近傍人是非自己利害必納刺請益  
嘗西至星田拜鼓山任祭酒南涉智島謁重菴金先  
生至寡陋如不佞者亦在相善之列猥蒙過從矜耽  
羅黑山絕海之間而轉至青城病廬蔬糲與共琴書  
相歡或以時月計焉其志正欲博學並觀取長棄短  
用以為守身辨惑之地非欲為隨眾循外徒資觀聽  
終乃服勤於蘆沙奇先生得聞為學大要又其所冀  
坐春立雪而同飲於河者皆斐然一時之名流則蓋  
將及朮務實歛晦養以期至于高明光大之域而

天不假壽以今 上丙戌五月二十九日卒距其生  
哲宗庚戌得年僅三十七嗚呼其溫仁慈愛之姿樂  
善好古之志果敢直前之勇寧可復得以見乎吾夫  
子珣云不幸短命死者殆君之謂也君狀貌豐盈辭  
色溫潤事親至孝婉愉之色達於面目叱咤之聲不  
及於犬馬日必冠帶持身以禮待物以恕至於齊家  
睦族多有人所難及者讀書常在蕭寺憤排刻苦無  
一時怠慢意作文賦詩隨遇立就不事雕飾筆法道  
健典雅無拘孳態此皆可傳不可泯也仍竊念昔君  
之入海也重翁聞而稱之曰古之馬東平復見於今

日常以聿修命號其齋以寓勸戒之意噫得此於當  
時長德亦云難矣又豈不足為百世不朽之明證也  
歟塋于古龍面相村乾坐原君先娶平澤林氏基休  
女育一女適奇世弘後娶蔚山金氏壚休女有二男  
長源東次幼君歿之六年源東千里躡蹻來請記實  
之狀余感舊懷新義不容辭因叙次梗槩如右

長湍府使田公事狀

歲庚子余僑寓湖西之定陽問知其居久世遠為境  
內主人者三家田氏居一焉屬有一儒生賁然入門  
峨冠博帶依然有故家典型亟延而坐而叩之則田

免壽集  
姓孝詰名伯賢字居治南二十里外洞洞即田氏平  
泉也遂贊三隱合稿一部請述其十一世祖退菴公  
事實余謂所或乎人者為其有多少履歷合有表章  
而奈君家文獻若是何唯講明祖宗以來傳授心法  
忠孝大節是目下切務至若疑信去處只得博攷載  
籍勿犯手勢者庶其寡過乎蓋我 中 明之際乃  
明良相遇羣賢彙征之日也公年十七中生員二十  
六登文科內而歷成均館典籍東學教授奉常寺判  
官至司憲府掌令外而石城縣監歷清風羅州至長  
湍都護府使晚賦遂初扁其居室以退菴者抑亦取

義於急流勇退之故事也是其幼而學壯而行老而  
歸灼然如是則可知公為人惜乎其言論風旨他無  
所攷惟杏壇盤石流傳其小少讀書習字之地而對  
策中三代以上治本乎道三代以下治本乎法十六  
字尤見其言近旨遠傳之無弊也一羽全鳳愈小愈  
貴又曷可少也哉公諱九疇字錫禹其先潭陽人麗  
朝未隱先生貴生為五世中祖中郎將漢少尹卞郡  
守可種叅奉士發其四世外祖司直禮安金晚生辛  
亥癸丑其生卒墓在蟠蛇山亥生之原淑夫人廣州  
安氏監察湜女三男二女長有年薦除社稷署叅奉

次有春有達禹應龍安自福塔也會孫稔壬辰舉義  
贈兵曹參議稽從事儒門官都事蓋公之餘蔭也

假監役畏窩崔公行狀

公諱琳字贊夫號畏窩崔氏籍月城胄于羅卿相杵  
麗入我朝司成諱洵錄清白吏四傳至承旨三聘  
承旨生參判臣輔參判生軍資奉事震興無嗣取貞  
武公震立第四子東吉子之杵公五世以上高祖國  
鎮曾祖哲基祖慶煒考宗崙並隱德不仕妣密陽朴  
氏再燁女以正廟己亥十一月十二日舉公于龜  
山舊笏里人咸曰世傳貞武公之降也此山三鳴今

亦如之異矣哉公稟姿絕倫孝敬聰敏著自幼齡年  
未就傅已能通經史善屬文輒言孝字從子悌字從  
弟孝父悌兄其事雖殊理則一也其事親也居窶而  
善養在幃而能婉值喪居廬食粥一依禮制其為學  
也不由師承自知勉勵常以為理未嘗不備而散在  
萬物則大小精粗未可遺闕道未嘗不存而載在方  
冊則師友講辨不容少緩於是以通透明睿之姿加  
人百已千之工不厭不憚始終如一日又以為天之  
賦予有生所同非我得私雖草野之微韋布之賤所  
以範圍天地陶鑄人物者亦未嘗非分內也遂本之

以五書五經忝酌於古今事變而著會精沿流之篇  
則聖賢傳授之統帝王損益之政瞭如指掌其為後  
學之指南當世之切務者其功又不貲矣公家世寒  
素不恒厥居晚年卜居于西山雲門之孔巖四方學  
者至者甚衆公隨叩隨應若決江河意至則角巾藜  
杖徜徉逍遙於水聲山色之間觴詠自適其視世間  
榮辱不啻若太空浮雲未除繕工監假監役不就以  
憲宗辛丑十月二十三日考終于寢訃聞遠近人士  
皆咨嗟歎息謂善人逝矣塋在隱仙巖先兆坐西之  
原男濟邦女徐宅魯濟邦男世顯女洪秉海世顯男

任壽女任錫禹李允炯任壽二孤皆幼嗚呼國俗自  
分黨以來各阿其私世間真是非蓋未有聞公於是  
時不待文王而興固已洞然於陰陽向背公私淑慝  
之別屹然壁立鐵萬夫沮撓少不移動又有如剛齋  
宋文簡梅山洪文敬為師為友磨礱浸灌則其姿稟  
淵源之正大醇實不可誣矣望實所孚聲名洋溢於  
紳推轂侯伯擁篲終至聲聞于天若可大用而才露  
一命公又老衰未展厥施可勝惜哉狀是族孫世鶴  
所撰考公平生纖悉周全質而不文無用架疊謹撮  
其大畧尚論如右後之人尚有以考焉爾

兗樞鄭公行狀

公諱達周字邦彥自號野隱其先晉陽人也考諱秤王考諱慶得有節孝文行曾祖諱咸一青嚴道察訪麗朝左侍中裕其鼻祖也妣茂松尹氏淹女公以崇禎紀元壬辰十月十二日生于咸平月岳里第幼而聰穎九歲受潘陽節史論過目成誦無一字差誤門中父老咸推以遠大之器及長習功令文字兼治明經業年四十二擢丙科隸屬國子由學諭學錄養賢庫直長歷奉常寺主簿至直諱司藝尋除幽谷道察訪時公年七十餘嶺之士大夫莫不推之以有德

耆老完福善人而舉願納交未幾年八十通政為兗知中樞府事又四年為內外回卷三男三壻五福俱全又與鄭荅泉東里再從姪萬崱為三老會如香山故事時人艷之夷考其所以致此則公忠厚之德出於天性孝友之行得之家庭一身喫著棄奢從儉平居事為少文多質事親而極志物之養墓在家右一里許省掃往來雖隆冬盛寒淫雨凍雪未嘗或怠至今稱侍墓洞讀詩至蓼莪篇未始不三復流涕居家處事待人接物醇謹篤實惟義與比嘗言交遊之道善則友之不善則斯已矣色目二字不須較也釋褐

數十年未嘗為越趨之足嘯嗚之言每以自媒自銜  
干時或進為深恥蓋其所養深厚所執牢確非庸人  
凡夫所能彷彿其藩墻也以乙卯十二月考終于寢  
塋在本里西距數里滿正洞卯原噫天下之物豐于  
此者恒患其不足於彼得於人者恒患其不得於天  
故世以董江都齒肩之說為名言然觀於公則其自  
天佑之吉無不利而為百世為善之勸者又不可以  
一例論吁亦盛矣哉夫人李氏事君子無違禮訓子  
姪有法度三男三女男長萬濟娶士人金鳴夏女喪  
室有一子蚤歿繼娶士人文載大女仲曰萬興娶縣

監文德龜女季曰萬達以孝行著娶進士李國徵女  
女長適士人李會運仲適李龍徵季適李相東萬濟  
有四子一女長台煥次東煥繼仲父后次仁煥季胄  
煥女適羅允武萬興無子子東煥萬達有三子五女  
長麟煥次龜煥龍煥女適金熙宅李恒瑞武科金坤  
全元宅羅台應公之後孫學奎鍾璣忠原袖其家狀  
屬余隙括不容以老病辭

迪順副尉韓公行狀

韓君鍾澤遠自湖南鎮安過余病室而言曰吾先祖  
副尉公事親之孝衛國之忠與夫辭爵休退之實的



有不可掩者而顧傳來本狀合有可刪潤者幸文人  
深加矜閱而裁度焉余作而曰有是哉子之言也此  
在餘人尚欲考實而闡揚况於孝子慈孫為先之地  
可視為等閑而任其泯泯乎謹按公諱孝淵字景顏  
號止軒系出上黨以三韓功臣蘭為鼻祖屢傳至禮  
賓卿光胤歷文惠思肅文敬文簡文靖事功名德昭  
載史乘不須譜也高祖士介府使 贈兵曹參判曾  
祖胤昌文科官至禮曹參判祖克慎司圃寺別提考  
堅礪節校尉水運判官妣宜人李氏籍完山考監察  
獻繼妣月城李氏考翊公生而穎秀及長有智力善

騎射象皆推之以緩急可仗 萬曆壬辰清平府院  
君應寅以八路都巡察使禦倭于臨津公會以門蔭  
補迪順副尉至是隸在幕下一日家僮以親疾告急  
公涕泣言公義私情不可兩全將如之何巡察許以  
歸養時判官公嬰重疔差劇無常不可以時月責効  
公晨昏洞屬凡適於口便於體者至誠準備周年如  
一日及密居廬盡制會朝廷設諸功臣賞賚宴特除  
義盈庫奉事公謂無功冒職有關廉隅固辭不就退  
居光州治西羣芳內洞等室服田教子課孫以為樂  
享年七十六而卒於戊子五月壬支葬在內洞坐卯

之原配安人文化柳氏僉樞德容女和柔貞淑事君  
子無違禮歿先公十二年墓附左一男必顯折衝副  
護軍娶光山李氏同知之英女生五男一女男長如  
項忠義衛次如瑾如瑞忠義衛如琢如琇女士人高  
斗殷庶子必綱生三男如徵如璧如星曾玄若干人  
噫公之偉行善蹟宜多可述而文獻斷爛無所考據  
者在親戚緇黨尚不可容易論定况於百年之後徒  
憑紙上文字妄有云云安保其十分徵信而免汰哉  
之誚乎姑依本叙次以待來者

默齋金公行狀

默齋金公相觀字仲賓湖右之望于儒者也從遊三  
溪趙文敬公篤學實踐其制行也七年親病藥餌扶  
將殫誠竭力罔或少懈遭艱廬墓盡制不梳不肉奉  
繼母如所生事無巨細必稟命後行篤於友于寢食  
與共以至訓子姪睦宗族忠於鄉黨信於朋友貧不  
能喪塋嫁娶者並到底施力多人所不能處自少從  
事不出於詩禮經傳傍及性理羣書類識會憤熟如  
誦已言晚益自勵到老彌篤或有叩問請益輒酬接  
沛然無所疑滯蓋其稟質之美用工之實不可誣也  
金氏籍光山新羅未有王子與光知國將亂出為庶

人遜居光之西一洞其後八世相繼為平章事麗朝  
門下侍中文安公良鑑直提學忠定公若時二十三  
世若十四世自是珪組文行譜不絕書祖鎮德考載  
明妣丹陽禹氏曰載恒晉州金氏其本生以 正廟  
庚申四月十五日生卒於今 上丁丑正月十四日  
塋在舒川郡北溪後麓酉坐之原夫人全州崔氏益  
煥女墓各窆一男二女男箕五繕工監假監役女適  
俞鶴煥趙迎夏監役系子在詰生貞女進士閔泳鳳  
在詰不佞晚交也以申斯文泰鎮所述遺事請比類  
屬辭以就正本噫聞先人之常情不容以老病辭略

加刑潤如右後之人庶有以攷焉

耻菴李君行狀

君諱祖元字元亮晚號恥菴李氏出自隴西始祖諱  
茂唐中即將從蕪定邦至百濟留仕新羅封延安伯  
子孫因籍焉歷高麗至 本朝名卿顯爵聞人達士  
炳載史乘不煩譜也曾大父諱瑫師事尹久菴鳳九  
於湖洛同異之論深致慨然未嘗出一語為左右袒  
大父諱度心父諱圭嫡母德水李氏姜氏其所生母  
也生以 純廟甲申卒於今 上庚子十月二十八  
日享年七十七君自幼機警氣像不帖帖能知敬父

兄恤窮餓多出人意表見者莫不嘖嘖稱賞年十二  
喪所生天只叫號哭泣于殯于窆朝夕守衛如平日  
侍奉門父兄慮或致疾欲其止萬端終不聽既長博  
學經史至義利公私人物邪正辨持不苟遇事理肯  
繁衆所疑眩處便迎刃破竹靡有疑滯趙公秉翼曾  
任原州通判君為戚誼所在嘗過而入其室適見一  
獄案在傍乃舅欲淫於其婦而其婦泣諫不聽事覺  
後自死而營題以為虛實然疑間其舅既死則使之  
自盡為世所警云者也座客一辭稱之君曰諸公之  
見誤矣此題妄發而誤殺人命苟如是則新臺之女

楊家之娘為世所效而有賞典耶聞者竦然且謂是  
題之下字極難為倫紀所關故也君其呼之君即應  
曰其舅某也本非病風喪性乃其狂氣之發也天地  
不足為大於其心秋毫不足為細於其眼父母視若  
荆越子女見若路人乘夜入婦室有若自妻然其婦  
戰慄泣諫置舅於不瑕之地處身於無罪之境孰謂  
鄉曲賤女之處變若是乎及其事發病氣乍退本心  
之仁稍回含羞自死病某也者狂也殺某也者仁也  
尸身出給使之安塋其婦放歸本里使無倫無義之  
女子有所效則云一座咸服其明見丙寅西洋入寇

時君寓居瑞山瑞海邑也浦氓初見異樣船擊鳥獸  
散君引一解事者諭之曰國家不結怨於洋豈容相  
害汝若逃散三百州郡皆望風以汝爲口實將何辭  
以明之我將與彼問答審其虛實汝等皆安堵如故  
已而事定當路者使人問國家大計君輒對以振士  
氣修文德治甲兵養百姓嚴防守據險清野之法又  
謂東倭西洋之前予宜先備而姑通信於倭以觀動  
靜如壬辰故事伸大義以絕洋虜遠奸凶以杜禍根  
設不可犯之勢以備不虞又曰夷狄如女色近之遠  
之難以信義責惟以直應變使無致憾據義防患俾

勿接踵殆庶幾乎問者歎美之不已且勸納交私親  
君乃聲言毀撤院宇使忠賢不祀者便亦士林之讐  
此言胡爲而至哉傍觀爲之縮頸其審於料敵明於  
向背而不屈威武有若此者平生好論語誦念不已  
家素窶蔬糲不給而非義之物視若浼焉伯仲氏卒  
無嗣並置田立後不替舊樣自壬午軍變足迹未嘗  
一及京師服田課子若將終身乙未闈 母后見殺  
主上毀形則輒痛哭太息如不欲生其憂念 宗國  
老而不衰者又可使一時頑鈍背義無恥者類當愧  
死萬萬矣惜乎世鮮知德不辜一命而坎壈以沒也

葬在公州鳳山南負壬之原夫人慶州金氏洪泰女  
一男二女男佻檢書全在定黃有性婿也余晚寓定  
山入其境聽士友誦傳則操履文行並推君為首問  
其居十里而近計早晚相接庶不虛作此行曾未幾  
月遽聞不淑慨世道之日非痛逆韻之莫追今於記  
事之狀不容以老拙辭

敦寧府都正心巖文公行狀

公諱鳳休字明直其號心巖心乎白巖白巖生庭所  
在也文氏系出南平以新羅武成公多省為始祖麗  
末有諱益漸有大名于東夏封江城君謚忠宣諱和

都承旨 贈左贊成謚景惠諱尚行叅議 贈判書

謚敬肅諱自修縣監以德行事鄉賢祠是公十二世  
祖也曾祖諱演身祖諱顯相考諱範龍成均進士妣  
昌寧曹氏允復女崇政知中樞府事諱永國 贈貞  
敬夫人光山金氏其本生父母也以 純廟癸酉四  
月十二日舉公子白巖里第公生而端正目瑩然聰  
敏善讀書不勞師教而學日就貞敬夫人素有法度  
每親戚有啗必素餐公遵成家法終身不廢辛卯正  
月進士公卒公以知事公命八系赴哀窆塋一遵禮  
制時公才十九歲矣曹夫人性嚴重家又清儉公內

奉備慈外幹家務怡愉勤儉終始如一以餘力學文  
孜孜不已如心經近思錄朱書及石潭莘陽諸先生  
文集常不離案上每到義理緊要處必書揭座右以  
資警省無事則終日端坐不見惰容常以進士公自  
誠箴靜室獨坐心為嚴師為八字符已巳丁內憂哀  
毀踰制御家嚴內外之別或有子孫久淹內閫者輒  
厲聲誡責飭婦女非有婢子先諾則不敢往來於大  
小家奴僕非有使令不得入內與人款洽辭氣謙恭  
又益加敬曰晏平仲善與人交吾夫子之所美也鄉  
里有不善者輒糾正遇忿難息遽益寬閑事亦理每

歲正供必令精潔曰昔祖考秋熟後必先封正稅以  
餘穀入私庫子孫嘗遵而則之可也尤謹祭祀雖在  
癸盞之時必齋宿勿勿屬屬以致如在之誠將事之  
夕歛衽整冠以待鷄鳴既享之後猶終日愀然晨必  
謁廟新物必薦生庭忌辰躬齋祭需往參不以隆寒  
暑雨而小弛居常節儉食不兼味衣止禦寒一切洋  
物禁不入家戊辰土賊陷光陽郡邑騷然公凝然不  
動撫諭閭里一境賴以安心每聞忠臣烈士直言得  
罪者輒義形於色俯仰嘘唏者久之國家自納洋以  
後禍變多端至甲午乙未而極矣公不勝痛憤曰賤

免補具  
齡支離忍見此時雖欲赴死於先王宗廟下而不可得也是其忠愛一念不以身在草野而有間也乙未聞域內章甫往往舉義慨然曰義則義矣其於上下之阻隔何常愛吟瑩淨雲間月分明雨後山將身無愧立中天興八清和境界邊等句蓋取其氣象意趣之有合也辛卯除繕工監假監役壬辰陞通政為敦寧都正戊戌正月一日考終于正寢壽八十六塋于綾州之內洞壬原遠近士友環經奠哭者數十人初娶利川徐杓女後娶光山金光欽女俱贈淑夫人金氏幽閒淑哲奉姑事君子承順無違備嘗酸寒

而祭祀之奉賓客之需殫誠竭力無所闕乏蓋公安貪勵行亦有內助云先公十六年卒舉四男三女男璟煥進煥達煥奎煥金出也女崔相翼閔泳祚李根會徐出也璟煥男載弘進煥男載廷達煥男載謨載尚奎煥男時恒時昌時浩曾孫男濟東濟興載弘出也餘並幼嗚呼公早歲當室雖未得盡心致力於學問上事然由資質之純厚故志之所立者篤有不聞聞則必行有不行行則必力其日用酬接之間自然無違理悖義之舉嘗曰讀書之法先須虛心平氣玩理推義沉潛乎句讀檢察乎身心有所不足反躬修



厲跂以及之不可以僞心粗慮貪多務得要人稱譽也又曰讀得一尺不如行得一寸此皆非摸狀擬著之言乃其平日喫緊自得之效也不佞與公雖未有一日之雅然嘗從書尺得知公謹慎君子矣頃年家兒永祚遊湖南拜公還盛稱公修己齊家之實好賢樂善之誠而壘壘不已其懿德質行之必有感服人者槩可想見矣若使公進而少試於世足以反靡俗而回淳風惜乎其終老林樊而世莫之聞也達煥克趾公美從余遊既年矣以余有一得之見抄公事行請爲記實之文余不忍終辭遂叙次如右以告秉筆

者

同敦寧尹公行狀

坡平尹公諱滋學字景道咸平望族考諱奭鎮 贈  
叅判祖諱大儉 贈叅議曾祖諱在莘 贈判書麗  
朝侍中文肅公諱瓘其上祖也妣光山金氏考翰洙  
公以 純祖庚寅六月十二日生德器天成自少已  
知科學非算一等事惟倫理上立本根經禮中用程  
曆覃思實踐到老采勤其造詣之深有不可得而測  
也顧其可見之行則事親盡禮一如古所謂孝者而  
於奉先之道尤盡誠力碑世塋之墓豐仝一之享縮

衣食推剩餘置庠收族畧如范氏家例教子弟有法  
度待人以誠接物以仁燕居常收拾身心整頓几案  
專精誦讀無一毫怠慢之意知其為巖然君子人也  
嘗過三田渡見滿州勒石輒峻文討罪以寓其悲憤  
慷慨之意今 上戊子筮仕由監察陞敦寧都正辛  
卯嘉善壬辰同敦寧 馳贈三世無疾而以明年七  
月初六日考終于東湖書室東湖其號也臨絕呼諸  
子申之以平日訓辭會親黨以教九族保一門眷眷  
致意命布新潔席易褻衣怡然而逝其正終不亂如  
此塋在縣之平陵面鳳陽洞坐申之原配貞夫人水

原崔氏之翰女嗣子相龍謹飭好義又與奇松沙諸  
公倡復讐之兵事雖未就炳炳忠義可質神明是尹  
氏之門一何多賢也於是袖其家狀千里跋涉屬余  
刪潤遂不辭而叙次如右後之人尚有以攷焉

右副承旨金公行狀

竹圃金公諱禹鉉字子洪其先金海人曾祖諱泰錫  
贈吏議祖諱鳳浩 贈吏叅考諱衡王妣金氏重鑑  
女同敦寧衡鶴貞夫人邊氏其本生父母 景陵丁  
酉十月十七日生聰穎絕倫書過目成誦文翰神速  
風韻跌宕儕流莫能先 當子丁卯登文科初以攝

記注入侍於周旋應對雍容舒泰絕無鄉里態 上  
深加嘉尚特賜衣資以寵之隸屬成均由學錄學正  
陞博士典籍為司憲府掌令辛巳因大臣言槐院調  
用特除弘文館修撰陞資為敦寧府都正歷兵曹參  
議叅知工曹叅議同副右副承旨於外昌樂參禮察  
訪鎮岑務安縣監高原郡守富寧慶興府使公律身  
清簡遊刃恢恢所典郡邑厨供外餘盡屬民不以一  
絲自累獄案之稍涉疑貳訴牒之不由實情者並以  
法理裁之由是風采隱然吏憚民畏出言孚號不肅  
而威其在務安正稅之三年未納吏逋之數萬乾沒

旬月磨勘弊局復完在慶興 德 安陵舊墟及赤  
池碑閣重修一新及其再莅則值清俄相猜之會  
宸慮方深公申明條約處置得宜貢賦之為民害者  
首先蠲除於是流亾畢集闔境安堵即因廟堂奏請  
加資蒙 允而未及 下批此其始終踐歷之梗槩  
也公眉目清揚儀觀偉麗四歲過房盡心事所後母  
母甚安之敦寧公九耄康寧每自外歸侍輒怡愉左  
右衾席展卷躬執不替人或引竒聞異蹟陳說於前  
或撫摩肌背若嬰兒戲以悅其心志在官值事餘終  
日不迎客明燭以達朝詣宗家必舍車徒以寡約入

邊幅不設於容畦畛不出於口此又平日行誼之大略也嗚呼我東雖褊小才智賢能世不乏人苟養之有道取之有法八路之選足以備百僚而無遺才倖位之歎顧有司對揚循習陋規區區於地勢遠近門閥微顯雖以 聖祖龍興舊邦亦且規同荒服不數於卿士大夫之列殆數百年公奮興嶺北孝友之政著自鄉里循良之績結知 聖明玉署銀臺除擢聯翩 康色溫言顧問頻煩至乃託之以北門鎖鑰而眷注不置者亦可見君臣間際會也使其因此而進登廟朝展布所蘊則以公憂國如家愛君如父之至

誠惻但值此板蕩之日所以贊襄內修經理外務樹立事功又豈但如是而止哉奈時事紛綸勢蕩機激而猝然有甲午之警則殆運會之使然也公迹滯邊陲憂念成疾竟以乙未四月二十六日卒于官吏隸氓卒莫不奔走號哭如失父母以至清管官賻奠洩哀若至親然可見公德之入人者深矣塋于龍巖先兆坐巽之原齊淑夫人全州李氏載憶女男河瑤生員主簿李容觀李秉文太明軾漢城判事全州金昌奎壻也側出男河璉河琰河琳餘幼河瑤男翼松軫松斗松餘幼女崔俊九外孫成人者三主簿袖家狀

訪余屬以潤色之事余病淹床第辭不堪任顧好德同情撫卷增慨又不可默然已也遂叙次如右秉筆者有以考焉

司憲府掌令尹公行狀

歸潁齋尹公滋華字重明坡平望族高祖諱東勳曾祖諱五莘祖諱丁圭 贈司僕正考諱璣鎮 贈左承旨妣 贈淑夫人慶州李氏考宗夏公以 純祖乙酉生 哲宗乙卯登明經科隸屬權知承文院副正字由堂后記注除 肇慶廟別檢陞六為成均館典籍吏曹正郎司諫院正言司憲府持平掌令連原

金郊察訪此其履歷公家貧好讀書鍊達古事該貫物情養親極志物居喪盡哀戚友于兄弟謹於奉先對子弟眷眷言孝悌忠信其在仕務乘田委吏隨遇盡職權門要津視之若浼未嘗為趨趨之足躡嚙之言及至丙子納洋時事大變則輒喟然歎曰蹄迹交橫此非士君子出仕之日乃奉身遂初結廬於潁水之上飯蔬飲水經籍自娛意至則呼僮命賓登高臨流輸出性情絕無壹鬱不平之意發於言語動止之間此其行治大畧噫比諸始終迷溺於形勢之途而喪志辱身者高下得失果何如也乃以今 上甲申

九月干支病卒于寢臨絕囑子姪曰居家以和勿忘  
張公藝同九世之忍字處事以義恒念漢昭烈勅後  
主之善言又曰我死歛以深衣勿用公服其正終不  
亂如此塋在笠燈負坤之原配淑人商山金氏考采  
海子相馨相與相德相珏過房李昌鍾朴永華姜吉  
秀壻也

忍齋尹公事狀

公諱茲東字郊仲坡平世家同中樞就可 贈叅判  
聖貫 贈禮議有徽禰祖曾三世公以 肅廟庚寅  
生歿於 正廟甲辰塋缸洞負坤之原公早失恃能

致哀至見繼母無戚容及喪年七十猶行素三年嘗  
著自警詩歷叙父子師弟夫婦兄弟朋友各五絕一  
首以揭壁觀省嗚呼性命倫理人之稟於天具在身  
無古今豐齋之殊但皆為物慾之蔽不得以全之惟  
覺者能知其然而思力行以復之耳若公者其庶乎  
覺者歟顧今洋瀾滔天六合昏濛三綱五常之道無  
地可講苟有一言一行之可以發明此道者即不問  
其人之微顯其學之淺深皆可懷之以好音也吾故  
表以出之以警夫人面而歟心者公初聘咸平李氏  
繼娶淳昌林氏光山金氏男得喆義喆時喆諱文者

長房曾孫相源也

愚山鄭公事狀

愚山鄭公不佞晚交也老而益壯居今好古之風殆  
十駕難追可謂歲寒一遇其愛慕傾倒思所以永以  
為好者豈有量哉而乃以今 上巳亥十一月二十  
六日考終于洞陰寓舍享年六十八嗚呼何德之豐  
志之遠而不究其終也公諱元永字仁汝身川世家  
文忠公圃隱先生為顯祖五傳至賢輔官長城府使  
坐事謫北鄭氏居文川始此曰教采 淑陵奉事曰  
煥奎曰陽基曰周鎔是高曾祖考並隱德不仕妣慶

州金氏都事性虛女公生而聰穎八歲能辭屬文十  
二丁外憂饋奠哭泣執禮如成人蚤習公車不利有  
司乃知此外有用心處杜門讀書求志甚勤又以為  
歷覽山川消暢壹鬱諮訪師友展拓見聞是古人遠  
遊之意也何庸區區守空堂為哉遂東躡崑廬之巔  
俯瞰東海之波西至王都領略文物之盛又南至湖  
西南訪鼓山任公洲齋宋公芸窓朴公溪雲金公所  
到皆迎必虛座輪囷致福樂與之交而無斁而任公  
則以詩示意曰儒風終不振一世共趨名對鏡難逃  
影撞鍾必有聲雲歸山自靜日出海初清林下餘師

在莫教混物情又曰滄洲終古有奇人好向雲濤不  
混塵子亦澄心須變化魯連明月是前身此其期待  
之深規一時諸子尤有別焉甲申丁內憂前此公於  
仁智之樂不能忘情再入金剛至是為戴星之行以  
生不能致養病不及藥餌沒不得臨訣為終身慟謂  
文鄉非士君子久居之地乃全家踰鐵嶺奠居于距  
王城百三十里地三世墳墓次第移葬而無怨悔蓋  
將依近日邊與時消息為進退之計者而坐席未暖  
奄爾長逝噫亦命矣夫公平居必整勅衣帶言語動  
止繩尺斬然愛人利物寬裕有容而至義利剖判人

獸分別便一刀兩段無毫髮依違苟且之態奉先以  
孝教子以義得宗族信鄉黨皆余耳目所覩記也墓  
在禮山典佛巽坐之原配高靈李氏尚胤女有女士  
風先公十一年卒生二男長謙和為伯父後次說和  
有一女適士人金有聲敏和謂公以從叔者也述其  
行屬余刪潤嗚呼愚山翁不可復見而余亦將朝夕  
就木不可以文拙乃已遂為之狀以待秉筆者取證  
焉



勉菴先生文集卷之三十八

